

Dhātuvaṃso

Namo tassa bhagavato arahato sammāsambuddhassa

1. Tathāgatassāgamanakathā

Sambuddhamatulaṃ suddhaṃ dhammaṃ saṅghaṃ anuttaraṃ,
Namassitvā pavakkhāmi dhātuvaṃsappakāsaṇaṃ;
Tikkhattumagamaṃ nātho laṅkāḍīpaṃ manoramaṃ,
Sattānaṃ hitamicchanta sāsanaṃ ciraṭṭhitim.

Tattha tikkhattumagamaṃ nātho`ti anamatagge saṃsāraṇaṃ parināmetvā appatisaraṇabhāvappattānaṃ lokiyalokuttarasukhanipphādanabhāvena nātho patisaraṇa bhūto bhagavā buddhadhammasaṅgharatanattayamaggaṃ ācikkhanto laṅkāḍīpaṃ tikkhattuṃ gato. Tattha paṭhamagamaṃ tāva bodhimaṇḍaṃ āruya puratthimābhimukho nisīditvā sūriye anattamiteyeva mārabalaṃ vidhametvā, paṭhamayāme pubbenivāsaṇaṃ anussarivā majjhimayāme cutupapātaṇaṃ patvā pacchimayāmasāne paccayākāre ñāṇaṃ oṭāretvā dasabalacatuvesārajjādi guṇapatimaṇḍitaṃ sabbaññutaṇaṃ paṭivijjhivā bodhimaṇḍappadesa anukkamena sattasattāhaṃ vītināmetvā aṭṭhame sattāhe ajapālanigrodhamūle nisinna dhammagambhirataṃ paccavekkhanaṃ appossukkataṃ āpajjamāno dasasahassa brahmaparivārena sahampatimahābrahmunā āyācitadhammadesano hutvā buddhacakkhunā lokaṃ olokento pañcavaggiyānaṃ bhikkhunaṃ bahūpakāraṃ anussarivā uttāyāsanaṃ kāsaṇaṃ puraṃ gantvā aññākoṇaḍaṇṇappamukhe aṭṭhārasa brahmakoṭiyo amataṃ pāyento dhammacakkaṃ pavattetvā pakkhassa pañcamiyā pañcavaggiye sabbepi te arahante patiṭṭhāpetvā taṃ divasameva yasakulaputtassa rattibhāge sotāpattiphalaṃ datvā punadivase arahantaṃ datvā tassa saḥāyake catupaññāsajane arahantaṃ pāpetvā evaṃ loke ekasatṭhiyā arahantesu jātesu vutthavasso pavāretvā, ‘caratha bhikkhave cārika’ nti bhikkhu disāsu pesetvā sayāṃ uruvelaṃ gacchanta antarāmagge kappāsikavanasaṇḍe bhaddavaggiye kumāre tiṃsajane vinetvā ehibhikkhubhāvena pabbājetvā uruvelaṃ gantvā aḍḍhuḍḍhāni pāṭihāriyasahassāni dassento uruvelakassapādayo sahasajajāṭiparivāre tebhātikajaṭṭile vinento tattheva vihāsi. Aparabhāge aṅgamagadharatṭhavāsino uruvelakassapassa mahāyaṇaṃ upaṭṭhāpesuṃ. So pana icchācārābhībhūto cintesi? ‘‘Sacāyaṃ mahāsamaṇo imassa samāgamaṃ majjhe pāṭihāriyaṃ kareyya lābhasakkāro me parihāyissati’’ti. Tassevaṃ pavattaajjhāsayāṃ ñatvā pātova uttarakuruto bhikkhaṃ āharitvā anotatte āhāraṃ paribhuñjitvā sāyānaṃ samaye phussapuppaṃ uposathadivase laṅkāḍīpassatthāya laṅkāḍīpamupāgami.

Tassa pana dīpassa mahāgaṅgāya dakkhiṇapasse āyāmato tiyojane puthulato ekayojanappamaṇe mahānāgavanuyyāne yakkaṃ samāgamaṃ majjhe tassa upari mahiyanāgāṇaṭṭhūpassa patiṭṭhānaṭṭhāne ākāseyeva ṭhīto vutthivā tandhakāraṃ dassetvā tesāṃ bhayaṃ uppādesi. Te bhayena upaddutā ‘‘kassa nu kho imaṃ kamma’’nti ito cito olokento addasaṃsu bhagavantaṃ ākāse nisinnaṃ. Disvāna bhagavantaṃ abhayaṃ yāviṃsu. Tesāṃ bhagavā āha?

‘‘Sace tumhe abhayaṃ icchatha mayhaṃ nisajjaṭṭhānaṃ okāsaṃ dethā’’ti. Sabbepi te tassa nisajjaṭṭhānaṃ adāsu. Bhagavā nisajjāya okāsaṃ gahetvā tesāṃ bhayaṃ vinodetvā tehi dinne bhūmibhāge cammakhaṇḍaṃ pattharivā nisīdi. Nisinnova pana bhagavā cammakhaṇḍaṃ pasāresi. Te yakkhā bhīṭatasitā aññattha gantuṃ asahamānā samantato sāgaraṭṭire rāsibhūtaṃ ahesuṃ. Satthā giridīpaṃ iddhānubhāvena āharitvā dassesi. Tesu tattha patiṭṭhitesu puna yathāṭṭhāneva ṭhāpetvā pattharitamakkhaṇḍampi saṃkhipi. Tasmim khāne tato tato devā sannipatiṃsu. Tesāṃ samāgame dhammaṃ desesi. Anekaṃ paṇakoṭiṇaṃ dhammābhisamayo ahoṃsi. Saraṇesu ca sīlesu ca patiṭṭhitā asaṅkheyyā ahesuṃ. Sumanakūṭe pana mahāsumanadevo sotāpattiphalaṃ patvā attano pūjanīyaṃ bhagavantaṃ yāci. Bhagavā tena yācito sīsaṃ paṇiṇā parāmasitvā kesadhātuṃ gahetvā tassa adāsi. Datvā ca pana laṅkāḍīpaṃ tikkhattuṃ padakkhiṇaṃ katvā parittaṃ katvā ārakkhaṃ saṃvidhāya puna uruvelameva āgato. So pana kesadhātuyo suvaṇṇacaṅgoṭakenādāya satthu nisinnaṭṭhāne nānāratanehi vicittaṃ thūpaṃ patiṭṭhāpetvā upari indaṇṭilamaṇiṭṭhūpikāhi pidahitvā gandhamālādīhi pūjento vihāsi. Parinibbute pana bhagavati sārīputtassa antevāsiko sarabhū nāma thero khīṇāsavo

citakato iddhiyā tathāgatassa gīvaṭṭhiṃ ādāya tasmim̐ indanīlamanīthūpe paṭiṭṭhāpetvā meghavaṇṇapāsāṇehi dvādasahatthaṃ thūpaṃ kārāpetvā gato. Tato devānampiyatissaraṇo bhātā cūḷābhayo nāma kumāro tamabbhutaṃ cetiyaṃ disvā abhippasanno taṃ paṭicchādetto tiṃsahatthaṃ cetiyaṃ paṭiṭṭhāpesi. Puna duṭṭhagāmaṇī abhayamahārājā taṃ paṭicchādetvā asītihatthaṃ kañcukacetiyaṃ kārāpesi. Mahiyaṅgaṇa thūpassa paṭiṭṭhānādhikāro evaṃ vitthārato veditabbo?

Bodhiṃ patvāna sambuddho bodhimūle narāsabho

Nisīditvāna sattāhaṃ pāṭihīraṃ tato akā.

Tato pubbuttare ṭhatvā pallankā īsake jino

Animisena nettena sattāhaṃ taṃ udikkhayi.

Caṅkamitvāna sattāhaṃ cakkhame ratanāmaye

Vicinitvā jino dhammaṃ varaṃ so ratanāghare.

Ajapālamhi sattāhaṃ anubhosi samādhijaṃ

Ramme ca mucalindasmiṃ vimuttisukhamuttamaṃ.

Rājāyatanamūlamhi sattarattindivaṃ vasī

Dantaponodakaṃ sakko adāsi satthuno tadā.

Catuhi lokapālehi silāpattaṃ samāhaṃ catukkamekakaṃ katvā adhiṭṭhānena nāyako.

Vāṇijehi tadā dinnaṃ manthaṇca madhupiṇḍikaṃ

Tahiṃ pana gahetvāna bhattakiccaṃ akā jino.

Gaṇhiṃsu saraṇaṃ tassa tapussabhallikā ubho

Saraṇaṃ agamaṃ te taṃ satthu dinnasiroruhā.

Gantvāna te sakaṃ raṭṭhaṃ thūpaṃ katvā manoramaṃ

Namassim̐su ca pūjesuṃ dvebhātikopāsakā.

Iti so sattasattāhaṃ vītināmesi nāyako?

Brahmunā yācito satthā dhammacakkaṃ pavattituṃ.

Tato bārāṇasiṃ gantvā dhammacakkaṃ pavattayi

Koṇḍañño desite dhamme sotāpattiphalaṃ labhi.

Brahmāno'ṭṭhārasakoṭī devatā ca asankhiyā

Sotāpattiphalaṃ pattā dhammacakke pavattite.

Patto pāṭipade vappo bhaddiyo dutiye phalaṃ,
Tatiye ca mahānāmo assajī ca catutthīyaṃ.

Te sabbe sannipātetvā pañca' me pañcavaggiye,
Anattasuttaṃ desetvā bodhiyagga phalena te.

Bodhiṃ pāpetvā pañcāhe yasattherādike jane,
Tato maggantare tiṃsakumāre bhaddavaggiye.

Uruvelaṃ tato gantvā uruvelāya saññitaṃ,
Uruvelenanuññāto uruvelanāgaṃ dami.

Taṃ taṃ damī jino nāgaṃ damanena urādigamaṃ,
Tathāgataṃ nimantiṃsu disvā te pāṭihāriyaṃ.

Idheva vanasaṅgasmim vihāretvā mahāmunī,
Upaṭṭhāhāmase sabbe niccabhāttena taṃ mayamaṃ.

Uruvelakassapassa mahāyaññe upaṭṭhite,
Tassa'ttano nāgamane icchācāraṃ vijāniya.

Uttarakuruto bhikkhaṃ haritvā dipaduttamo,
Anotattadahe bhutvā sāyanha samaye sayamaṃ.

Bodhito navame māse phussapuṇṇamiyaṃ jino,
Laṅkādīpaṃ visodhetuṃ laṅkādīpamupāgami.

Yakkhe damitvā sambuddho dhātuṃ datvāna nāyako,
Gantvāna uruvelaṃ so vasī tattha vane jino.

Paṭhamagamana-kathā samattā.

Dutiya-gamane pana bodhito pañcame vasse jetavanamahāvihāre vasanto cūlodara'mahodarānaṃ mātulabhāgineyyānaṃ nāgānaṃ maṇipallaṅkaṃ nissāya saṅgāmaṃ paccupaṭṭhitaṃ disvā sayamaṃ pattacīvaramādāya cittamāsassa kālapakkhe uposathadivase nāgadīpaṃ gantvā tesamaṃ saṅgāmamajjhe ākāse nisinno andhakāraṃ akāsi. Te andhakārābhībhūte samassāsetvā ālokaṃ dassetvā attano saraṇabhūtānaṃ tesamaṃ sāmaggikaraṇatthaṃ phalabharitarukkhaṃ cāleno viya dhammaṃ desesi. Te ubhoṇi dhamme pasīdītva tampi pallaṅkaṃ tathāgataṃ adamsu. Bhagavā pallaṅke nisinno dibbanna-pānehi santappito bhattānumodanaṃ katvā asītikoṭiyo nāge saraṇesu ca sīlesu ca patiṭṭhāpesi. Tasmim samāgame mahodarassa mātulo maṇiakkhiko nāma nāgarājā bhagavantaṃ puna kalyāṇidesamāgamaṇatthaṃ. Ayāci. Bhagavā pana tuṅhībhāvena adhivāsetvā “jetavanameva gato.

Evañhi so nāgadīpaṃ upeto,
Mārābhībhū sabbavidu sumedho;
Dametva nāge karuṇāyupeto,
Gantvā vasī jetavane munindo.

Dutiya-gamana-kathā samattā.

Tatiya-gamane pana bodhito aṭṭhame vasse jetavanamahāvihāre viharanto bhagavā? “Mama parinibbānato pacchā tambapaṇṇidīpe sāsanaṃ patiṭṭhahissati, so dīpo bahu bhikkhubhikkhunī-upāsakopāsikādi ariyagaṇasevito kāsāvapajjoto bhavissati, mayamaṃ catunnaṃ dāṭhādhatunaṃ antare ekā dāṭhā ca dakkhiṇaakkhadhātu ca nalāṭadhātu ca rāmagāma-vāsīhi laddho ekakoṭṭhāso ca aññe bahusarīradhātu ca kesadhātuyo ca tattheva patiṭṭhahissanti anekāni saṅghārāmasahassāni ca. Buddhadhammasaṅgharatane patiṭṭhitasaddho mahājano bhavissati. Tasmā laṅkādīpaṃ gantvā tattha samāpattiṃ samāpajjitvā āgantūṃ vaṭṭatī “ti cintetvā ānandattheramaṃ

āmantesi? “Ānanda catupaṭṭisambhidappattānaṃ pañcasatamahākhiṇāsavānaṃ bhikkhūnaṃ paṭivedesi. Amhehi saddhiṃ gantabba ‘‘nti. Ānandatthero kapilavatthukoḷiya nagaravāsīnaṃ pañcasatamahākhiṇāsavānaṃ bhikkhūnaṃ paṭivedesi. Te paṭiveditā pañcasatakhīṇāsavā pattaṭṭivāradhārā hutvā satthāraṃ vanditvā añjaliṃ paggayha namassamānā aṭṭhaṃsu. Satthuno pana salalāya nāma gandhakuṭiyā avidūre rattasetanīluppalakumudapadumapuṇḍarīkasatapattasahassapattajalajehi sogandhika nānāpupphehi sañcannā, subhasopānā, pasādītasamatittikakākapeyyasuramaṇīyasītalamadhuṛodakā suphullapupphaphaladhārīta nānāvidhavicittasālasalacampakāsokarukkhanāgarukkhadīhi susajjitabhūmipadesā accantaramaṇiyā pokkharāṇī atthi. Tattha adhvattā mahānubhāvo sumanānāma nāgarājā soḷasasahassamattāhi nāgamāṇavikāhi parivuto mahantaṃ sirisampattiṃ anubhavamāno tathāgatassa rūpasobhaggappattaṃ attabhāvaṃ oloketvā mahantaṃ sukhasomanassaṃ anubhavamāno attano mātaraṃ nandanāgamāṇavikaṃ garuṭṭhāne ṭhapetvā tassā veyyāvaccāṃ kurumāno tasmimyeva pokkharāṇiṃ ajjhāvasati. Satthā pana attano gamanaṃ saṃvidhānānantare sumanaṃ nāgarājānaṃ avidūre ṭhitaṃ āmantetvā saparivāro āgacchā hīti āha. So sādhuṭi sampāṭicchitvā attano parivāre chakoṭimatte nāge gahetvā supuppītacampakarukkhaṃ tathāgatassa sūriyaraṃsinivāraṇatthaṃ chattaṃ katvā gaṇhi. Atha bhagavā ravirasmiṃpatthātasuvaṇṇapabbato viya virocamaṇo attano pattaṭṭivaramādāya ākāsaṃ abbhūggañchi. Satthāraṃ parivāretvā ṭhītā te pañcasatakhīṇāsavāpi sakaṃ sakaṃ pattaṭṭivaramādāya ākāsaṃ uggantvā satthāraṃ parivārayiṃsu. Satthā pañcasatakhīṇāsavaparivuto visākhaṃpuṇṇamuposathadivase kalyāṇiyaṃ gantvā mahārahe maṇḍapamajjhe paññattavara buddhāsane pañcasatakhīṇāsavaparivuto hutvā nisīdi.

Atha maṇiakkhiko nāma nāgarājā buddhapamukhaṃ bhikkhu saṅghaṃ anekehi dibbehi khajjabhojjehi santappetvā ekamantaṃ nisīdi. Satthā tassa bhattānumodanaṃ katvā sumanakuṭe padalañchanaṃ dassetvā tasmim pabbatapāde anekapādapākiṇṇabhūmippadesa nisinna divāvihāraṃ katvā tato vuṭṭhāya dīghavāpicetiyaṭṭhāne samāpattiṃ samāpajji. Mahāpathavī udakapariyantaṃ katvā satavāraṃ saḥassavāraṃ saṅkampi. Tattha mahāsenāṃ nāma devaputtaṃ ārakkhatthāya nivattetvā tato vuṭṭhāya mahāthūpaṭṭhāne tatheva samāpattiṃ samāpajji. Mahāpathavi tatheva kampi. Tatrāpi visālarūpa devaputtaṃ ārakkhaṃ gaṇhanatthāya ṭhapetvā tato vuṭṭhāya thūpārāma cetiyaṭṭhāne tatheva nirodhasamāpattiṃ samāpajji. Mahāpathavī tatheva kampi. Tattha ca pathavīpāla devaputtaṃ ārakkhatthāya. Nivattetvā tato vuṭṭhāya maricavaṭṭicetiyaṭṭhānaṃ gantvā pañcahi bhikkhusatehi saddhiṃ samāpattiṃ appayi. Pathavi tatheva kampi. Tasmim ṭhāne indakadevaputtaṃ ārakkhaṃ gaṇhanatthāya ṭhapesi. Tato vuṭṭhāya kācaragāmacetiyaṭṭhāne tatheva samāpattiṃ samāpajji. Pathavi tatheva kampi. (Tasmim ṭhāne mahāghosa devaputtaṃ ārakkhaṃ gaṇhanatthāya niyyādesi) etasmim mahācetiyaṭṭhāne mahāghosaṃ nāma devaputtaṃ ārakkhaṃ gahaṇatthāya nivattetvā tato vuṭṭhāya tissamahāvihāracetiyaṭṭhāne tatheva samāpattiṃ samāpajji. Pathavi tatheva kampi. Tattha maṇimekhalāṃ nāma devadhītaraṃ ārakkhaṃ gāhāpetvā tato nāgamahāvihāracetiyaṭṭhāne tatheva samāpattiṃ samāpajji. Pathavi tatheva kampi. Tasmimpi mahindaṃ nāma devaputtaṃ ārakkhaṃ gahaṇatthāya ṭhapesi. Tato vuṭṭhāya mahāgaṅgāya dakkhiṇadisābhāge seru nāma dahassa ante varāha nāma soṇḍimattake atimanoramaṃ udakabubbulaḷakelāsakūṭapaṭibhāgaṃ cetiyaṃ paṭiṭṭhahissatī’ ti pañcasatakhīṇāsavehi saddhiṃ nirodhasamāpattiṃ samāpajji. Bahalaghanamahāpathavi paribbhamitakumbhakāracakkaṃ viya pabhintamadamaḥā hatthināgassa kuñcanādakaraṇaṃ viya ucchukoṭṭana yanta-mukhasaddo viya (ca) satavāraṃ saḥassavāraṃ nadamānā somanassappattā viya sakalalaṅkāḍīpaṃ unnādaṃ kurumānā saṃkampi. Tato vuṭṭhāya sumananāgarañño hatthesu ṭhita campakarukkhatto pupphāni ādāya tattha pūjetvā punappunaṃ taṃ olokesi. So satthāraṃ vanditvā mayā bhante kiṃ kattabbanti pucchi. Imassa ṭhānassa ārakkhaṃ karohīti āha. So taṃ sutvā bhante tumhākaṃ gandhakuṭiṃ mama ārakkhaṃ karontassa rūpasobhaggappattaṃ asītyānubyañjanabyāmapabhādvattiṃsamahāpurisalakkhaṇavicittaṃ dassanānuttariyabhūtaṃ passantassa manosilātale sīhanādaṃ nadanto taruṇasīho viya gajjanto pāvussakamahāmegho viya ākāsaṅgaṃ otaranto viya ratanadāmaṃ ganthento viya ca aṭṭhaṅgasamannāgataṃ savanīyasaraṃ vissajjetvā bramhaghosaṃ nicchārento nānāyehi vicittakathaṃ kathayamānaṃ savanānurittayabhūtaṃ saṃsāraṇṇavanimuggānaṃ tārāṇasamattaṃ madhura dhammadesanaṃ suṇantassa, ñāṇiddhiyā koṭṭipatte sārīputtamoggallānādayo asītimahāsāvake passantassa, tattheva mayhaṃ vasanaṃ ruccati. Na sakkomi aññattha tumhehi vinā vasitunti āha. Bhagavā tassa kathaṃ

sutvā nagarāja, imaṃ padesaṃ tayā ciraṃ vasitaṭṭhānaṃ. Kakusandhassa bhagavato dhātu imasmiṃyeva ṭhāne patiṭṭhitā, tvameva tasmim̐ kāle varaniddo nāma nāgarājā hutvā tassā dhātuyā ārakkhaṃ gahetvā gandhamālādīhi pūjaṃ karonto ciraṃ vihāsi. Puna koṇāgamanassa bhagavato dhātu imasmiṃyeva ṭhāne patiṭṭhitā tvameva tasmim̐ kāle jayaseno nāma devaputto hutvā tassā dhātuyā ārakkhaṃ gahetvā gandhamālādīhi pūjaṃ katvā tattheva ciraṃ vihāsi. Puna kassapassa bhagavato dhātu imasmiṃyeva ṭhāne patiṭṭhitā. Tvameva tasmim̐ kāle dīghasālo nāma nāgarājā hutvā tāya dhātuyā ārakkhaṃ gahetvā gandhamālādīhi pūjaṃ karonto vihāsi. Mayi pana parinibbute kākavaṇṇatissamahārājā mayhaṃ nalāṭadhātuṃ imasmiṃyeva ṭhāne patiṭṭhāpessati, tasmā tvaṃ imassa ṭhānassa ārakkhaṃ karohīti vatvā pañcasīlesu patiṭṭhāpetvā pañcasatakhīṇāsavehi saddhiṃ cetiyatṭhānaṃ padakkhiṇaṃ katvā tvaṃ appamatto hohīti vatvā ākāsaṃ uppatitvā jetavanaṃ gato.

Tassa pana nāgarañño mātā indamānavikā nāma āgantvā tathāgataṃ vanditvā ekamantaṃ ṭhitā, bhante mama putto sumano nāma nāgarājā kuhinti āha. Tava putto tambapaṇṇidīpe mahāvālukagaṅgāya dakkhiṇabhāge seru nāma dahassa samīpe varāha nāma soṇḍiyaṃ samādhi appitattā attano parivāre chakoṭimatte nāge gahetvā sathāraṃ vanditvā bhante ito paṭṭhāya tumhākaṃ dassanaṃ dullabhaṃ, khamatha meti accayaṃ desetvā mahatiṃ nāgasampattiṃ gahetvā puttassa sumananāgarājassa santikaṃ gantvā mahatiṃ issariyasampattiṃ anubhavanti tattheva ārakkhaṃ gahetvā ciraṃ vihāsi.

Mahāpañño mahāsaddho mahāvīro mahāisi,
Mahābalena sampanno mahantaṅgaṇabhusito;
Gantvāna tambapaṇṇiṃ so sattānuddayamānaso,
Gantvā nāgavaraṃ dīpaṃ agā jetavanaṃ vidu.

Atisayamatisāro sārādānaṃ karonto,
Atiadhiraṃaṇiyo sabbalokekanetto;
Atiṅgaṇadharaṇiyo sabbasatte tamaggaṃ,
Ativipuladayo tānetumāgā sudīpaṃ.

Tatīyagamanakathā samattā.

Iti ariyajanapasādanatthāya kate dhātuvamse tathāgatassa gamaṇaṃ nāma paṭṭhamo paricchedo.

Āgantvā tambapaṇṇiṃ so sattānuddayamānaso

Puna gantvā nāgadīpaṃ agā jetavanaṃ varaṃ

Atisayamatisāro sārādāneka ratto

Atidhitiraṃaṇiyo sabbalokekanetto

Atiṅgaṇaraṃaṇiyaṃ sabbasantekamaggaṃ

Ativipuladayattā laṅkamāgā sudīpaṃ

Iti sīhaḷabhāsāya kate dhātuvamse dissate.

2. Parinibbānakathā

Sathā pana tato pañcacattālīsavassāni tipīṭakapariyattidhammaṃ desetvā veneyyajane saṃsārato catuariyamaggaḥapaṭilābhavasena uddhāretvā nibbāne patiṭṭhāpetvā pacchime kāle vesālinagaraṃ upanissāya cāpālacetiyaṃ nissāya viharanto mārena parinibbānatthāya ārādhito sato sampajāno āyusāṅkhāre vissajjesi. Tassa vissatṭhabhāvaṃ ānandoyeva aññāsi. Añño kocipi jānanto nāma natthi. Tasmā bhikkhusaṅghampi jānāpessāmīti jetavanamahāvihāraṃ gantvā sabbam

bhikkhusaṅghaṃ sannipātāpetvā bhikkhave tathāgatassa na cirasseva tiṇṇaṃ māsānaṃ accayena parinibbānaṃ bhavissati, tumhe sattatiṃsabodhi pakkhiyadhammesu samaggā hutvā ekībhāvā hotha, tumhe vivādaṃ mā karotha. Appamādena tisso sikkhā sampādetthāti vatvā puna divase vesāliyaṃ piṇḍāya caritvā piṇḍapātā paṭikkamitvā bhaṇḍagāmaṃ gato. Bhaṇḍagāmato hatthigāmaṃ hatthigāmato ambagāmaṃ ambagāmato jambugāmaṃ jambugāmato nigrodhagāmaṃ nigrodhagāmato bhoganagaraṃ bhoganagarato pāvānagaraṃ pāvānagarato kusinārānagaraṃ patto. Tatha yamakasālānamantare t̥hīto ānandattheraṃ āmantetvā untaśāsakaṃ katvā mañcakaṃ paññāpehi kilantosmi ānanda nipajjissāmi'ti āha. Taṃ sutvā ānandatthero uttaśāsakaṃ katvā mañcakaṃ paññāpetvā catugguṇaṃ saṅghāṭiṃ attharitvā pañcattālīsavassāni asayitabuddhaseyyaṃ sayanto dakkhiṇapassena sato sampajāno anuṭṭhānaśāññaṃ manasikarivā sīhaseyyaṃ kappesi.

Atītamaddhāna bhava caranto,
Anantasatte karuṇāyupeto;
Katvāna puññāni anappakāni,
Patto sivaṃ lokahitāya nātho.

Evam hi so dasabalopi vihīnathāmo,
Yamassa sālāna nipajji majjhe;
Katvāna saññāñhi anuṭṭhahānaṃ,
Sa iddhiṃ māramukhaṃ pavitṭho.

Tasmiṃ khaṇe samakasālā supupphitā ahesuṃ. Na kevalaṃ yamakasālāyeva supupphitā, atha kho dasasahassī lokadhātu cakkavāḷesu sālārukkhāpi pupphitā. Na sālārukkhāyeva supupphitā, atha kho yaṃ kiñci pupphupagaphalūpaga rukkhajātaṃ sabbampi pupphañca phalañca gaṇhi. Jalesu jalapadumāni thalesu thalapadumāni khandhesu khandhapadumāni sākhasu sākhapadumāni latāsu latāpadumāni ākāse olambapadumāni piṭṭhipāsāṇe hinditvā satapattapadumāni supupphitāni ahesuṃ. Pathavito yāva brahmaloko tāva dasasahassi cakkavāḷā ekamālāguṇā viya ahesuṃ. Devā ākāśato dibbamandāravapāricchattakakoviḷārapupphāni ca candanacuṇṇāni ca samākiraṇṭi. Dibbaturiyasaṅgītiyo ca antalikkhe pavattanti. Anekāni acchariyasahassāni ahesuṃ. Evam pūjāvisese pavattamāne paṭhamayāme subhaddaparibbājakaṃ vinetvā majjhimayāme dasasahassi lokadhātu devatānaṃ anusāsivā pacchimayāmāvasāne paṭhamajjhānaṃ samāpajjitvā tato vuṭṭhāya dutiyajjhānaṃ catutthajjhānaṃ samāpajji. Tato vuṭṭhāya ākāśānañcāyatanaṃ viññāṇañcāyatanaṃ ākiñcaññāyatanaṃ nevasaññānāśāññāyatanaṃ samāpajjitvā tato vuṭṭhāya nirodhasamāpattiṃ samāpajji. Tato vuṭṭhāya paṭhamajjhānaṃ dutiyajjhānaṃ tatiyajjhānaṃ catutthajjhānañca samāpajji. Tato vuṭṭhāya etthantarato anupādisesanibbānadhātuyā parinibbāyi.

Mahāmohatamaṃ hantvā sattānaṃ hadayassitaṃ,
Ravīva jotamāno so lokassa anukampako;
Vassāni pañcatālīsaṃ katvā sattahitaṃ bahuṃ,
Adhunā aggikkhandhova parinibbāyi so jino.

Evam pana bhagavati parinibbute vissakamma devaputto tathāgatassa sarīrappamāṇaṃ varadoṇiṃ ratanehi māpetvā visuddhakappāsehi tathāgatassa sarīraṃ veṭhetvā ratanadoṇiyaṃ pakkhipitvā gandhatelehi pūretvā aparāya doṇiyā pidahitvā sabbagandhadārucitakaṃ katvā yebhuyyena devatāyo lohita candanaghaṭikāyo ādāya citakāyaṃ pakkhipitvā aggim gāhāpetuṃ nāsakkhiṃsu. Kasmā? Mahākassapattherassa anāgatattā. So āyasmā mahākassapatthero yebhuyyena bahunnaṃ devānaṃ piyo manāpo. Therassa hi dānaṃ datvā sagge nibbattānaṃ pamāṇo nāma natthi. Tasmā devatā tasmiṃ samāgame attano kulūpagattheraṃ adisvā amhākaṃ mahākassapatthero kuhinti olokento attano parivārehi pañcamattehi bhikkhusatehi saddhiṃ maggaṃ paṭipannoti ñatvā yāva thero imasmiṃ na sampatto citakaṃ tāva na pajjalatuti adhiṭṭhahiṃsu. Tasmiṃ kāle thero yebhuyyena terasadhutaṅgadharehi pañcamattehi bhikkhusatehi saddhiṃ āgantvā citakaṃ tikkhattuṃ padakkhiṇaṃ katvā pādapasse t̥hīto, bhante tumhākaṃ dassanattāya ito kappasatasahassamatthake padumuttarasatthuno pādāmaḷe abhinīhārato paṭṭhāya avijahitvā āgato. Idāni me avasānadassananti pāde gahetvā vandituṃ adhiṭṭhāsi.

Mahākassapathero so bhikkhusaṅghapurakkhato;
Ekamaṃsaṃ cīvamaṃ katvā paggahetvāna añjalim.

Padakkhiṇaṇca tikkhattuṃ katvā ṭhatvā padantike;
Patiṭṭhahantu sīse me jinapādeti' dhiṭṭhahi.

Sahādhiṭṭhānaṃ citakā dussāni ca vibhindiya;
Nikkhamiṃsu tadā pādā ghanamuttova candimā.

Uho hatthehi paggayha ṭhapetvā attano sire;
Vanditvā satthuno pāde khamāpetvā visajjayī.

Puṇṇacando yathā abbhaṃ citakaṃ pāvisi tadā;
Idaṃ accherakaṃ disvā ravaṃ ravi mahājano.

Uṭṭhahitvāna pācīnā vando atthaṅgato yathā;
Pāde antaradhāyante arodiṃsu mahājanā.

Tadā mallarājāno bhagavato sarīrakiccaṃ karissāmāti vatvā nānāvattābharaṇāni nivāsetvā parivārayiṃsu. Tato rājāno manussā ca aggim dātuṃ ārahiṃsu. Tadā sakko? Mayi pana parinibbute sakko devarājā maṇijotirasaṃ pasāretvā nikkhantaaggina mama sarīrakiccaṃ karissati. Maṇiaggino avasāne manussā aggim karissantiti. Evaṃ buddhavacanaṃ paribhāvetvā nikkhattuṃ padakkhiṇaṃ katvā bhagavato sarīrakiccaṃ katvā samantato uṭṭhahatuti adhiṭṭhahi.

Tasmiṃ khaṇe sayameva citakaṃ aggi gaṇhi. Sarīraṃ pana bhagavato jhāyāmānaṃ chavicammamaṃsanahāruaṭṭhiatṭhimiṇjaṃ asetvā sumanamakuḷamuttārāsidadisameva dhātuyo avasesā ahesuṃ.

Parinibbutakālepi sakalaṃ kalunaṃ ahu;
Paridevo mahā āsi mahī udriyanaṃ yathā.

Devatāyānubhāvena satthuno citako sayam;
Tato ekappahārena pajjalittha samantato.

Yaṇca abbhantaraṃ dussaṃ yaṃ dussaṃ sabbabāhiraṃ
Dusse dveva na jhāyiṃsu tesam dussānamantare;

Yathā niruddhatelassa na masī na ca chārikā;
Evamassa na dissati buddhagattassa jhāyato.

Sumanamakuḷasabhāvā ca dhotamuttābhameva ca;
Suvaṇṇavaṇṇasaṃkāsā avasissaṃsu dhātuyo.

Dāṭhā catasso uṇhisaṃ akkhakā dve ca sattimā;
Na vikiṇṇā tato sesā vippakiṇṇāva dhātuyo.

Ahosi tanukā dhātu sāsapabījamattikā;
Dhātuyo majjhimā majjhebhinnataṇḍulamattikā.

Dhātuyo mahati majjhe bhinnamuggappamāṇikā;
Dhātuvaṇṇā tayo āsuṃ buddhādhiṭṭhānatejasā.

Sāriputtassa therassa sisso sarabhunāmakō;
Ādāya jinagīvaṭṭhiṃ citakātova dhātu so.

Saddhiṃ sissasahassena cetiye mahiyaṅgaṇe;
Ṭhapetvā cetiyaṃ katvā kusiṇārāmagā muni.

Chaḷabhiñño vasippatto khemo kāruṇiko muni;
Sahasā citakāto va māmadāṭhaṃ samaggahī.

Ākāsaṭo patitvāpi nikkhamitvāpi sālato;
Samantatombumuggantvā nibbāpesuṃ jalānaṃ.

Mallarājagaṇā sabbe sabbagandhodakena taṃ;
Citakaṃ lokanāthassa nibbāpesuṃ mahesino.

Evam pana sabbaloke karuṇādhiko sammāsambuddho vesākhapuṇṇamuposathe aṅgāradivase parinibbuto. Devamanussānaṃ saṅgahakaraṇatthāya yamakasālānamantare citakaṃ sattarattindivaṃ vasi. Tato vīsaṃ hatthasatikassa upari sattarattindivaṃ vasi. Yāva aggiparinibbāpanaṃ sattarattindivaṃ hoti.

Tato sattadivasāni kusiṇārāyaṃ mallarājaputtasu gandhodakena citakaṃ nibbāpayamānesu sālārukkhatto udakadhārā nikkhamitvā citakaṃ nibbāpayiṃsu. Tato dasabalassa dhātuyo suvaṇṇacaṅgoṭake pakkhipitvā attano nagare santhāgāre ṭhapetvā sattipaṇjaraṃ katvā dhanupākārehi parikkhipāpetvā sattāhaṃ naccagītavāditaḅandhamālādīhi mallarājaputtā sakkāraṃ kariṃsu.

Tato te mallarājāno rammaṃ devasabhopamaṃ;
Sabbathā maṇḍuyitvāna santhāgāraṃ tato pana.

Maggaṃ alaṅkaritvāna yāva maḅuṭacetiyā;
Hatthikkhandhe ṭhapetvāna hemadoṇiṃ sadhātukaṃ.

Gandhādīhipi pūjetvā kīḷantā sādhuḅkīḷitaṃ;
Pavesetvāna nagaraṃ santhāgāre manorame.

Dasabhūmasmiṃ pallaṅke ṭhapetvā jinadhātuyo;
Ussayuṃ te tadā chatte santhāgārasamantato.

Hatthīhi parikkhipāpesuṃ tato asse tato rathe,
Añño'ññaṃ parivāretvā tato yodhe tato dhanu;
Iti parikkhipāpesuṃ samantā yojanaṃ kamā,
Tadā naccehi gītehi vāditehi ca pūjayaṃ.)

Parinibbānakathā samattā.

Tato bhagavato parinibbutabhāvaṃ sutvā ajātasattu mahārājā kosiṇārakānaṃ mallānaṃ sāsanaṃ pesesi. Ahampi khattiyo bhagavāpi khattiyo satthuno sarīradhātunaṃ thūpaṅca mahaṅca karomīti. Teneva upāyena vesāliyaṃ licchavirājāno ca kapilavatthumaḅi sakyarājāno ca allakappake bulayo ca rāmagāmake koḷiyā ca veṭhadīpake brāhmaṇo ca pāvāyaṃ pāveyyakā ca sāsanaṃ pesetvā sabbe ekato hutvā kosiṇārakehi saddhiṃ vivādaṃ uppādesuṃ. Tesam pana ācariyo droṇabrāhmaṇo nāma. So tesam? Mā bhonto viggahavivādaṃ karotha, amhākaṃ bhagavā khantivādīyevāti vatvā tādisassa ca khantimettānuddayasampannaṃ sarīrabhāge kalahaṃ kātuṃ ayuttanti āha.

(Rājā ajātasattu ca licchavī ca narādhipā;
Sakyā ca allakappā ca koḷiyāpi ca rāmake.

Brāhmaṇo veṭhadīpo ca mallapāveyyakāpi ca;
Mallā ca dhātu atthāya aññamaññaṃ vivādayuṃ.

Evam sante tadā doṇo brāhmaṇo etadabravī;
Suṇantu bhonto me vācam hitamatthupasamhitam.

Khantivādī isikāle dhammapālakumārake;
Chaddante bhuridatte ca campeyye saṅkhapālake.

Mahākapijātakāle amhākaṃ lokanāyako;
Kopaṃ akatvā aññesu khantimeva akā jino.

Siṭṭhāsīṭṭhe sukhe dukkhe lābhālābhe yasāyase;
Tādī lakkhaṇasampanno khantivādesu kā kathā.

Evam bhavataṃ vivāde sampahāro na sādhuco;
Sabbeva sahitā hotha samaggā modamānakā.

Tathāgatassa sārīraṃ aṭṭhabhāgaṃ karomase;
Thūpā vitthāritā hontu pasannā hi bahujjanā.

Tena hi vibhajehi tvam aṭṭhabhāgantū brāhmaṇa;
Thūpā vitthāritā hontu pasannā hi bahujjanā.

Evam vutte tadā doṇo brāhmaṇo gaṇajetṭhako;
Suvaṇṇam nāḷim katvāna samam bhājesi rājunam.

Soḷasanāḷiyo āsum sabbā tā sesadhātuyo;
Ekekapuravāsīnam dve dve doṇo adā tadā.

Dhātuyo ca gahetvāna haṭṭhatuṭṭhā narādhipā;
Gantvā sake sake raṭṭhe cetiyāni akārayum.

Doṇo tumbaṃ gahetvāna kāresi tumbacetiyaṃ;
Aṅgārathūpaṃ kāresum moriyā haṭṭhamānasā.

Ekā dāṭhā tidasapure ekā nāgapure ahu;
Ekā gandhāravāsīye ekā kāḷiṅgarājīno.)

Tattha doṇoti? Tadā gaṇācariyo. So dhātuyo vibhajanto ekaṃ dakkhiṇadāṭṭhādhatum gahetvā veṭṭantare ṭhapesi. Tadā sakko ajja dakkhiṇadāṭṭhādhatum ko labhatīti cintetvā veṭṭantare passi. So ratanacaṅgoṭakaṃ gahetvā adissamānakāyena gantvā dhātum gahetvā tāvatimsabhavane cūḷāmaṇicetiya ekayojanubbedhamyeva mahantaṃ thūpaṃ katvā ṭhapesi. Ekaṃ dakkhiṇadāṭṭhādhatum pādaggantare akkamitvā gaṇhi. Ettāvatā tāvatimsabhavanadantadhātukathā paripuṇṇā veditabbā.

Tadā jayaseno nāma nāgarājā bhagavato parinibbutabhāvaṃ sutvā ajja pacchimadassanaṃ passissāmīti mahantaṃ nāgarājasampattiṃ gahetvā kusināraṃ gantvā mahāpūjaṃ katvā ekamantaṃ ṭhatvā pādaggantare ṭhitaṃ dhātum disvā nāgeddhibalena gahetvā nāgabhanam netvā nāgapurassa majjhe ratanakhacite cetiye ṭhapesi. Tam tambapaṇṇiyaṃ kākavaṇṇatissarājakāle mahādevattherassa sisso mahindatthero nāma nāgabhanam gantvā dakkhiṇadāṭṭham gahetvā tambapaṇṇiyaṃ serunagaraṃ haritvā giriabhayassa serunagarapabbatantare cetiyaṃ kārapetvā ṭhapesi.

Ettāvatā nāgabhanadantadhātukathā paripuṇṇā veditabbā.

Tatrāyaṃ gandhāravāsīnoti? Ekā vāmadāṭṭhā doṇo nāma ācariyo nivattha vatthantare ṭhapetvā gaṇhi. Tadā eko gandhāravāsī pubbe laddhabyākaraṇo katābhinihāro vatthantare ṭhatapidantadhātum

disvā kusalacittena tato dantadhātum gahetvā gandhāravāsikehi saddhim attano raṭṭhaṃ gantvā cetiyavane ṭhapesi.

Ettāvatā vāmadantadhātukathā paripuṇṇā veditabbā.

Tattha adho vāmadantadhātum sārīputtattherassa sisso khemo nāma muni jālacitakatova uppativā vāmadāṭhaṃ gahetvā kāliṅgapuram netvā brahmadattassa rañño samīpaṃ gantvā dantadhātum dassetvā? Mahārāja vāmadantadhātum bhagavā tameva imasmim jambudīpe yāva guhasīvaparamparā devamanussānaṃ atthaṃ karitvā pariyosāne guhasīvarañño pāhessatīti (nīyādetum) āhāti nīyādesi.

Aparabhāge hemamālā rājakaññā dantakumārena saddhim brāhmaṇavesaṃ gahetvā dantadhātum ādāya palāyitvā vāñije ārocetvā nāvā vegena gantvā ceva nāgasupaṇṇehi mahantaṃ pūjaṃ kāretvā anukkamenāgantvā jambukoḷapaṭṭanaṃ patvā dijavarassa ācikkhitamaggena anurādhapuram patvā kittissirimeghassa pavattiṃ pucchitvā navavassaāyusamāno tīsu saraṇesu pasannabhāvaṃ sutvā meghagiri mahātherassa santikaṃ gantvā vanditvā ekamantaṃ nisīditvā dantadhātum jambudīpato gahetvā āgatabhāvaṃ ārocetvā dassesi. Disvā ca pana pītiyā phuṭo ubhinnampi saṅghaṃ katvā mahāvihāraṃ alaṅkāretvā jinadantadhātum ṭhāpetvā ekaṃ bhikkhum pesetvā taṃ pavattiṃ rañño ārocāpesi. Taṃ sutvā rājā pītipāmojjo cakkavattissa sirisampatto daḷiddo viya tassa pāṭihāriyaṃ disvā vīmaṃsitvā nikkankho hutvā sakalalaṅkāḍīpena pūjesi. Etena nayena pūjaṃ katvā ekadivaseneva navalakkhaṃ pūjesi.

Sīhaḷindo ubhinnampi bahūni ratanāni ca;
Gāme ca issare ceva datvāna saṅghaṃ akā.

Ettāvatā adhodaṭṭhādadhātukathā paripuṇṇā veditabbā.

Cattālīsa samā dantā kesā lomā ca sabbaso devā hariṃsu ekekaṃ cakkavāḷaparamparā.

Tatra vacane, cattālīsa samā dantāti? Sesadantā ca kesā ca lomā ca nakhā ca sabbasopi mayi parinibbuta-kāle mā ḍayhantu luñcivā ākāse patiṭṭhantu ekekacakkavāḷaṅca ekekakesalomanakhadantadhātuparamparā netvā cetiyaṃ kāretvāna devamanussānaṃ atthaṃ karotuti adhiṭṭhahi. Tasmā parinibbutakālato yāva sarīraṃ na ḍayhati tāva chabbaṇṇarasmiyo lomadhātu na pajahati. Doṇabrāhmaṇopi dhātuvibhajanāvasāne veṭhantare ca nivāsanantare ca pādaggantare ca dhātunaṃ vinaṭṭhabhāvaṃ ṇatvā pathaviyaṃ uttānakoyevajāto. Tadā sakko devarājā disvā ayaṃ deṇācariyo dhātu atthāya anuparivattetvā vināsaṃ pāpuṇeyya ahaṃ viṇācariyavesaṃ gahetvā tassa santikaṃ gantvā sokaṃ vinodessāmīti sakkarūpaṃ jahitvā viṇācariyavesaṃ gahetvā tassa santikaṃ gantvā ekamantaṃ ṭhito dibbagītaṃ gāyitvā vīnaṃ vādentō nānappakāraṃ udānesi. Yaṃ dhammametaṃ purisassa vādaṃ chindissāmīti vatvā kathāya sotunaṃ lobhaṃ parassa atthaṃ vināsetvā atilobhena puriso pāpako hotīti. Haṃsarājajātaṃ dīpetvā yaṃ laddhaṃ taṃ suladdhanti āha. Taṃ sutvā doṇo ayaṃ viṇācariyo mayhaṃ thenabhāvaṃ aññāsīti sokaṃ vinodetvā uttāya āvajjamāno tumbaṃ disvā yena bhagavato sarīradhātuyo mitā sopi dhātugatikova. Idaṃ thūpaṃ karissāmīti cintetvā tumbaṃ gahetvāna cetiye ṭhapesi. Moriyā aṅgāraṃ gahetvā aṅgaracetiyaṃ nāma kāresuṃ.

(Nagare kapilavatthumhi sammādiṭṭhi bahujjano;
Tattha sārīrikaṃ thūpaṃ akāsi ratanāmayam.

Nagare allake ramme buddhadhātu patiṭṭhiya;
Silāya muggavaṇṇāya thūpaṃ sadhātukaṃ akā.

Jano pāveyyaraṭṭhasmim patiṭṭhiya sārīrikaṃ;
Silāya maṇivaṇṇāya pāveyyam cetiyam akā.

Cīvaraṃ pattadaṇḍaṅca madhurāyam apūjayum;

Nivāsanam kusaghare pūjayimsu mahājanā.

Paccattharaṇam kapile uṇṇalomañca kosale;
Pūjesum pāṭaliputte karakam kāyabandhanam.

Nisīdanam avantisu campāyam 'dakasātakam;
Devaraṭṭhe attharaṇam videhe parissāvanam.

Vāsi-sūciḡharañcāpi indapatthe apūjayum;
Pāsānake padaṃ seṭṭham bhaṇḍasesam parantake.

Mahiṃsu manujā dhātuṃ aṭṭhadoṇamitaṃ tadā;
Dhātu vitthāritā āsi lokanāthassa satthuno).

Te pana rājāno hi attanoladdhadhātuṃ gahetvā sakasakanagaraṃ gantvā cetiyam kārāpetvā mahantaṃ pūjāvīdhānaṃ karimsu. Cakkhumantassa bhagavato sarīradhātu aṭṭhadoṇamattaṃ suvaṇṇanāḷiyā ekasataaṭṭhavīsatināḷikā ahoṣi? Satthā pana uttarāsāḷhanakkhattena mātukucchiyaṃ paṭisandhim gaṇhi. Visākhanaḷhakkhattena mātukucchito nikkhami. Uttarāsāḷhanakkhattena mahābhiniḷkhamanaṃ nikkhami. Visākhanaḷhakkhattena buddho ahoṣi. Uttarāsāḷhanakkhattena dhammacakkaṃ pavattesi. Teneva yamakapāṭihāriyaṃ akāsi. Assayujanakkhattena devorohaṇam akāsi. Visākhanaḷhakkhattena parinibbāyi. Mahākassapattherā ca anuruddhatthero ca dve mahātherā bhagavato sarīradhātuyo vissajjāpetvā adamsu.

Tesaṃ rājunaṃ bhagavato sarīradhātuṃ labhitvā sattadivasasattamāsādhikāni sattavassāni mahārahaṃ pūjaṃ katvā gatakāle micchādiṭṭhikamanussā? Samaṇo gotamo parinibbuto. Tassa dhātu atthāya amhākaṃ jīvitakappaṇam nāsetvā pūjaṃ karotī' ti sammāsambuddhe padussanti. Sakko āvajjento taṃ kāraṇam ñatvā mahākassapattherassa ārocesi; 'bhante micchādiṭṭhikā manussā bhagavati paduṭṭhacittena ito cutā avīcinirayaṃ uppajjanti. Bahutarā anāgate micchādiṭṭhikā mātupitughātakā rājāno bhavissanti. Ajjeva dhātuyo nidahituṃ vaṭṭatī' ti therō vicāretvā addasa.

Anantamatthaṃ dharamānakāle katvāna sattānamalīnacitto sesānamatthāya sarīradhātuṃ ṭhapetva so maccumukhaṃ upeto. (Katvā yo bodhiñāṇam vividhabalavaraṃ bujjhituṃ pāramīyo vatvā saṅkheyyapuṇṇe aparimitabhava uttaritvā sumuttaṃ. Ārohitvāna sīghaṃ ariyasivapadaṃ accutaṃ sītibhāvaṃ patto so jātipāraṃ nikhilapadahaṇam dukkaraṃ kārayitvā.

Dhātvantarāyaṃ disvāna therō kassapasavhayo;
Nīdhānaṃ sabbadhātunaṃ karohīyāha bhūpatiṃ.

Sādhūti so paṭissutvā māgadho tuṭṭhamānaso;
Dhātunīdhānaṃ kāresi sabbattha vattitādiya.

Kārāpetvāna so rājā kassapassa nivedayī;
Dhātuyo āharī therō idaṃ kāraṇamaddasa.

Bhujāṅgā parigaṇhiṃsu rāmagāmamhi dhātuyo;
Cetiye dhārayissanti laṅkādiṭṭhe anāgate.

Tā dhātuyo ṭhapetvāna therō kassapasavhayo;
Rañño ajātasattussa adāsi dhātuyo tadā.

Gehe cūpakaraṇāni catusaṭṭhisatāni so;
Abbhantare ṭhapesi rājā sabbā tā buddhadhātuyo.

Karaṇḍāsīti saṃkiṇṇaṃ cetiyāsītilaṅkataṃ;

Gehe bahusamākiṇṇaṃ thūpārāmappamāṇakaṃ.

Kāretvā sabbakaraṇaṃ vālikaṃ okirī tahiṃ;
Nānāpupphasahassāni nānā gandhaṃ samākiri.

Asīthittherarūpāni aṭṭhacakkasatāni ca;
Suddhodhanassa rūpampi māyāpajāpatādinaṃ.

Sabbāni tāni rūpāni suvaṇṇasseva kārayi;
Pañca chattadhajasate ussāpesi mahīpatī.

Jātarūpamaye kumbhe kumbhe ca ratanāmaye;
Pañca pañca sateyeva ṭhapāpesi samantato.

Sovaṇṇanikkhamayena ca kapāle rajatāmāyē;
Puresi gandhatelassa jālapetvā padīpake.

Pañca pañca sateyeva ṭhapāpesi disampati;
Ime tatheva tiṭṭhanta adhiṭṭhāsi mahāmuni.

Vitthāritā dhammāsoko bhavissati anāgate;
Akkhare soṇṇapattamhi chindāpesi mahāmatī.

Pakappitvā visukammaṃ dhātugabbhasamantato;
Vātavegena yāyantaṃ yantarūpamakārayī.

Katvā silāparikkhepaṃ pidahitvā silāhi taṃ;
Tassūpari karī thūpaṃ samaṃ pāsānathūpiyaṃ.)

Dhātunidhānakathā samattā.

Iti ariyajanaṃpasādanatthāya kate dhātuvaṃse tathāgatassa parinibbutādhikāro nāma dutiyo paricchedo.

3. Dhātuparamparākathā

Dhātusu pana vibhajitvā dīyamānesu satthuno nalāṭadhātu kosinārakānaṃ mallānaṃ laddhakoṭṭhāseyeva ahosi. Mahākassapatthero te upasaṅkamitvā satthuno nalāṭadhātu tumhākaṃ koṭṭhāse ahosi, taṃ gahetuṃ āgato, bhagavā hi dharamāneyeva tambapaṇṇidīpassa anujāni, ‘tasmā taṃ amhākaṃ dethā’ti. Taṃ sutvā mallarājāno?’Evaṃ patigaṇhatha bhante dhātu’ti mahākassapattherassa adamsu. So attano saddhivihārikaṃ mahānandattheraṃ pakkosāpetvā nalāṭadhātuṃ therassa niyyādetvā’ imaṃ dhātuṃ tambapaṇṇi dīpe mahāvālukagaṅgāya dakkhiṇabhāge serunāma dahassa ante varāha nāma soṇḍimatthake kākavaṇṇatisso nāma rājā patiṭṭhāpessati, cetiyaṃ saṅghārāmaṃ kārapessati, tvaṃ imaṃ dhātuṃ gahetvā vesāliyaṃ upanissāya mahāvanavihāre kuṭāgārasālāyaṃ satthuno vasitagandhakuṭiyaṃ ṭhapetvā dhātupūjaṃ katvā āyusaṅkhāre ossaṭṭhe parinibbāpayamāne attano saddhivihārikassa candaguttattherassa dhātuvaṃsaṃ kathetvā appamatto hohī’ti vatvā dhātuṃ therassa datvā anupādisesanibbānadhātuyā parinibbāyi.

Sāvako satthukappo so pabhīnnaṭṭhisambhido;
Gahetvā mānāyī dhātuṃ mahānando mahāvane.

Tassa therassa saddhivihāriko candaguttatthero dhātuṃ gahetvā ākāsaṃ uggantvā sāvattthīyaṃ jetavanamahāvihāre dasabalena vasitagandhakuṭiyaṃ ṭhapetvā dhātupūjaṃ katvā ciraṃ vihāsi. Sopi āyusaṅkhāre ossaṭṭhe parinibbāpayamāne attano. Saddhivihārikaṃ bhaddasenattheraṃ pakkosāpetvā

dhātuṃ therassa niyyādetvā dhātuvamsaṃ kathetvā anusāsivā anupādisesāya nibbānadhātuyā parinibbāyi.

Candagutto mahāpañño chaḷabhiñño visārado;
Ramme jetavane dhātuṃ ṭhapetvā vandanaṃ akā.

Tassa sisso bhaddasenatthero dhātuṃ gahetvā ākāsenā gantvā dhammacakkappavattane isipatane mahā vihāre satthuno vasitagandhakuṭiyāṃ ṭhapetvā gandhamālādīhi pūjetvā ciraṃ vihāsi. So parinibbāpayamāno attano saddhivihārikassa jayasenattherassa dhātuṃ niyyādetvā dhātuvamsaṃ kathetvā anupādisesāya nibbānadhātuyā parinibbāyi.

Bhaddaseno mahāthero katakicco mahāisi;
Dhātuṃ ṭhapetvā isipatane vanditvā nibbutiṃ gato.

So pana jayasenatthero taṃ dhātuṃ gahetvā veluvanamahāvihāre satthuno vasitagandhakuṭiyāṃ ṭhapetvā gandhamālādīhi pūjetvā ciraṃ vasitvā parinibbāpayamāno attano saddhivihārikassa mahāsaṅgharakkhitattherassa dhātuṃ niyyādetvā dhātuvamsaṃ kathetvā anupādisesāya nibbānadhātuyā parinibbāyi.

Gahetvāna dhātuvaraṃ jayaseno mahāmuni;
Nidhāya veluvane ramme akā pūjaṃ manoramaṃ.

So panāyasmā saṅgharakkhitatthero dhātuṃ gahetvā ākāsenā āgantvā kosambiṃ upanissāya ghosita seṭṭhinā kārapite ghositārāme bhagavato vasitagandhakuṭiyāṃ ṭhapetvā gandhamālādīhi pūjaṃ katvā ciraṃ vihāsi. So'pi parinibbāpayamāno attano saddhivihārikaṃ mahādevattheraṃ pakkosāpetvā dhātuvamsaṃ kathetvā appamatto hohi'ti vatvā anupādisesāya nibbānadhātuyā parinibbāyi.

Saṅgharakkhitavhaya thero cando viya supākaṭo;
Ṭhapetvā ghositārāme akā pūjaṃ manoramaṃ.

Tassa therassa saddhivihāriko mahādevatthero dhātuṃ gahetvā devānampiyatissassa mahārañño bhātu mahānāgassa uparājassa mahāgāme setacchattaṃ ussāpitakāle hatthoṭṭha nāmajanapade kukkuṭapabbatantare mahāsālarukkhamūle ākāsatō otarivā nisīdi. Tasmim samaye mahākālo nāma upāsako attano puttadārehi saddhiṃ mālagandhavilepanaṃ dhajapatākādīni gāhāpetvā divasassa tikkhattuṃ mahantehi pūjāvīdhānehi dhātuṃ pariharitvā ciraṃ vasi. Māsassa aṭṭha-uposathadivase dhātuto chabbaṇṇaramsiyo uggacchiṃsu. Tasmim samaye so padeso buddhassa dharamānakālo viya ahoṣi. Janapadavāsī manussāpi therassa santike sīlāni gaṇhanti, uposathavāsaṃ vasanti, dānaṃ denti, cetiyassa mahantaṃ pūjaṃ karontī. Tato aparabhāge uparājā mahāgāme viharanto bheriṃ carāpesi? Yo amhākaṃ dasabalassa dhātuṃ gahetvā idhāgato, tassa mahantaṃ sampattiṃ dassāmīti. Tasmim kāle kuṭumbiko mahākālo uparājaṃ passissāmīti tassa anucchavikaṃ paṇṇākāraṃ gahetvā rājadvāre ṭhatvā sāsanaṃ paṇiṇi. Uparājā taṃ pakkosāpesi. So gantvā vanditvā ṭhito taṃ paṇṇākāraṃ rājapurisānaṃ paṭicchāpesi. Uparājā? Mātula mahākāḷa, tumhākaṃ janapade amhākaṃ satthuno dhātu atthi'ti āha. Mahākāḷo upa rājassa kathaṃ sutvā atthi deva, mayhaṃ kulupagattherassa santike ādāsamaṇḍalappamaṇaṃ satthuno nalāṭadhātu chabbaṇṇaramsihi ākāsapadese sūriyasahassacandasahassānaṃ uṭṭhitakālo viya obhāseti. So janapado buddhassa uppanakālo viya ahoṣi āha. Tassa kuṭumbikassa kathaṃ suṇantassaeva rañño sakalasarīraṃ pañcavaṇṇāya pītiyā paripuṇṇaṃ ahoṣi. Ativiya somanassappatto rājā mayhaṃ mātulassa mahākāḷassa satahassam kahāpaṇāni ca catusindhavayuttarathaṅca suvaṇṇālaṅkārehi susajjitaṃ ekaṃ assaṅga udakaphāsukaṭṭhānake khettaṅca pañcadāsīsataṅca dethā'ti vatvā aññaṅca pasādaṃ dāpesi. So uparājā ettakaṃ kuṭumbikassa dāpetvā taṃ divasameva nagare bheriṃ carāpetvā hatthassarathayānāni gahetvā kuṭumbikaṃ maggadesakaṃ katvā anupubbena hatthoṭṭhajanapadaṃ patvā ramaṇīye bhūmippadese khandhāvāraṃ bandhitvā amaccagaṇaparivuto kuṭumbikaṃ gahetvā therassa vasanaṭṭhānaṃ gantvā vanditvā ekamantaṃ aṭṭhāsi. Sesā amaccā kuṭumbiko ca therāṃ vanditvā ekamantaṃ aṭṭhaṃsu. Uparājā therāṃ vanditvā sārāṇīyaṃ kathaṃ katvā ekamantaṃ nisinna

paṭisanthāramakāsi. Mahādevattheropi sammodanīyaṃ kathaṃ katvā kissa tvaṃ mahārāja idhāgatosi āgatakāraṇaṃ me ārocehi'ti āha. Bhante tumhākaṃ. Santike amhākaṃ bhagavato nalāṭadhātu atthī kira. Taṃ vandissāmi'ti āgatomhī'ti āha. Thero? Bhaddakaṃ mahā rāja tayā katanti vatvā dhātugharadvāraṃ vivaritvā mahārāja buddhassa nalāṭadhātu atidullabhā'ti āha. Rājā soḷasehi gandhodakehi nahāyitvā sabbālaṅkārapatimaṇḍito ekaṃsaṃ uttarāsaṅgaṃ karitvā añjaliṃ paggayha namassamāno aṭṭhāsi. Buddhārammaṇāya pītiyā sakalasarīraṃ phuṭaṃ ahosi.

(Rājā pītivegena imā gāthā āha;
Namāmi vīra pāde te cakkāṅkita tale subhe;
Vandite naradevehi amataṃ dehi vandite.

Lokanātha tuvaṃ eko saraṇaṃ sabbapāṇinaṃ;
Loke tayā samo natthi tārehi janataṃ bahuṃ.

Mahaṇṇave mayaṃ bhante nimuggā dīghasambhave;
Appatissā appatiṭṭhā saṃsarāma ciraṃ tahiṃ.

Etarahi tumhe āpajja patiṭṭhaṃ adhigacchare;
Tumhākaṃ vandanaṃ katvā uttiṇṇamaṃ bhavaṇṇavā'ti.)

Tasmīṃ khaṇe dhātuto rasmiyo nikkhamiṃsu. Sakala laṅkāḍīpaṃ suvaṇṇarasadhārāhi sañchannaṃ viya ahosi. Mahantaṃ pītisomanassaṃ uppajji. Rājā mahantaṃ somanassaṃ patto hutvā haṭṭhatuṭṭho ahosi. So dhātugharato nikkhamitvā therena saddhiṃ alaṅkatamaṇḍape ekamantaṃ nisīdi. Ekamantaṃ nisīno (nisajjādose vajjjetvā seyyathidaṃ? Atiduraccāsanta-uparivāta-unnatappadesa-atisammukha-atipacachā'ti. Atidūre nisīno sace kathetukāmo uccāsaddena kathetabbaṃ hoti. Accāsanne nisīno saṅkaraṃ karoti. Uparivāte nisīno sarīragandho vāyati. Unnatappadesa nisīno agāraṃ karoti. Atisammukhe nisīno cakkhunā cakkhuṃ paharivā daṭṭhabbaṃ hoti. Atipacchā nisīno gīvaṃ parivattetvā daṭṭhabbaṃ hoti. Iti nisajjādosāṃ vajjjetvā nisīno). Evamāha. Bhante imaṃ dhātuṃ mayhaṃ detha. Mahantaṃ pūjāsakkaraṃ katvā pariharāmīti. Bhaddakaṃ mahārāja imāya dhātuyā sammāsambuddho dhamaṇṇoyeva vyākaraṇaṃ akāsi. Tumhākaṃ vaṃse jāto kākavaṇṇatisso nāma rājā imasmīṃ dīpe mahāvālukagaṅgāya dakkhiṇāṭṭere seru nāma dahassa ante varāha nāma soṇḍiyā matthake patiṭṭhapetvā mahantaṃ thūpaṃ karissatī'ti vatvā satthā tattha samāpattim samāpajjitvā pañcasatakhīṇāsavehi saddhiṃ tikkhattuṃ padakkhiṇaṃ katvā gato. Tasmā gaṇhatha mahārājā'ti vatvā dhātuṃ adāsi.

Rājā dhātuṃ gahetvā caturassapallanke dhātukaraṇḍakaṃ nidahitvā karaṇḍake dhātuṃ patiṭṭhapetvā taṃ kumudapattasannihamaṅgalasindhavayuttarathe ṭhapetvā samantā ārakkhaṃ saṃvidahitvā (rājā dhātuṃ gahetvā) pañcaṅgaturiye paggaṇhāpayamāno pacchā āgacchatu'ti mahājanassa sāsaṇaṃ vatvā mahādevattherassa santikaṃ gantvā? Tumhe bhante, dhātuyā upaṭṭhānaṃ karonto āgacchathā'ti āha. Thero tassa kathaṃ sutvā; 'mahārāja ayaṃ dhātu paramparā āgatā. Ahaṃ bhagavato dhammaḥāṇḍāgārīkaānandatthero viya imaṃ dhātuṃ pariharissāmi'ti vatvā attano paccayadāyakaṃ kuṭumbikaṃ āpucchitvā pattacīvaramādāya dhātuṃ upaṭṭhahiyamāno pacchato pacchato gacchatī. Rājā dhātuṃ gahetvā anupubbena mahāgāmaṃ patto mahāsenaguttaṃ pakkosāpetvā nagaraṃ alaṅkāraṇepī'ti āha. So nagare bherim carāpetvā aṭṭhārasa vīthiyo sammajjantu, puṇṇaghaṭe ṭhapentu, dhajapatākādayo ussāpentu, toraṇāni ussāpentu, pañcavaṇṇāni pupphāni okirantu, sakalanagaraṃ alaṅkarontu, gandhamālādayo gahetvā suddhuttarāsaṅgā hutvā sakalanāgarā paṭipathaṃ āgacchantuti āṇāpesi. Tato mahājano sabbaturiyāni ghosāpayamāno gandhamālādīhattho paṭipathaṃ nikkhanto. Devamanussā bhikkhubhikkhuniyo upāsakopāsikā appamāṇā ahesuṃ. (Gandhamālādi puṇṇaghaṭasamussitadhajākiṇṇā) parisā velukkhepasahassāni pavattayimṃsu. Sugandhavātābhigātasamuddaghosō viya sakalanagaraṃ ekaninnādajātaṃ. So rājā nagare bandhanāgāre sabbasatte bandhanā muñcantu, dhammena samena anusāsantuti vatvā dhātuṃ gahetvā attano nagaraṃ pavesetvā attano rājanivesanaṃ āgantvā nāṭakīnaṃ saññamadāsi dhātuṃ vandantuti. Nāṭakī nānābharaṇehi patimaṇḍitā rājagehato nikkhamitvā dhātuṃ vanditvā attano attano hatthagatāni turiyabhaṇḍāni sādhuṃ paggaṇhitvā mahantaṃ pūjamakaṃsu.

Tato vaḍḍhakim pakkosāpetvā rājanivesanato nātidūre nāccāsante subhumitale dhātugharam kārāpetvā mālākammalatākammādim patiṭṭhāpetvā dhātughare vicittamaṇḍapaṃ kārāpetvāna sattaratanamayam dhātukaraṇḍakaṃ kārāpetvā dhātukaraṇḍake dhātuṃ ṭhapetvā ratanapallaṅka matthake dhātuṃ ṭhapetvā upari vicittavitānaṃ bandhitvā sāṇiyā parikkhipāpetvā mahantena parivārena mahantaṃ dhātupūjaṃ akāsi. Mahājanā gandhamālaṃ gahetvā māsassa aṭṭhūposathadivase dhātuyā mahantaṃ pūjaṃ akamsu. Dhātuto raṃsiyo samuggacchanti. Mahājanā vimbhayajātā sādhuḥkāraṃ karonti. Somanassabhūtā sakalanagaravāsino buddhārammaṇa pītiṃ gahetvā divase divase dhātuyā mahantaṃ pūjaṃ karontā vītināmenti. Pañcasīlāni rakkhanti, buddhamāmakā dhammāmakā saṅghamāmakā hutvā saraṇāni gacchanti. Rājā mahājanassa ovadati. “Mettaṃ bhāvettha, karuṇaṃ muditaṃ upekkhaṃ bhāvettha, kule jeṭṭhāpacāyanakammaṃ karoṭhā”ti. Ovaditvā bhikkhusaṅghassapi cattāro paccaye gaṅgāya maho-ghappavattanakālo viya mahādānaṃ pavattesi. Mātāpituṭṭhāne ṭhatvā bhikkhusaṅghaṃ saṅgaṇhi. Mahājanā tassa ovāde ṭhatvā dānādāni puñṇāni katvā yebhuyyena tasmim kāle matā saggam gatā.

Kalyāṇavaggamhi patiṭṭhitā janā,
Dānādī puñṇāni karitva sabbadā;
Cutā cutā sabbajanā sumānasā,
Gatā asesam sugatiṃ subhe ratā.

Rājā dhātuyā mahantaṃ pūjaṃ karonto mahagāme vihāsi. Tena patiṭṭhāpitavihārā kathetabbā? Kathaṃ? Lenavihāraṃ candagirivihāraṃ koṭipabbatavihāraṃ nagaraṅgaṇavihāraṃ selakā vihāraṃ talākāvihāranti evamādayo vihāre patiṭṭhāpetvā tipīṭakamahāriṭṭhattherassa dakkhiṇodakaṃ datvā mahāvihāre niyyādesi. Evaṃ so rājā yāvajīvaṃ dhātuṃ pariharitvā pacchime kāle maraṇamañce nipanno attano puttaṃ yaṭṭalattissa kumāraṃ pakkosāpetvā; tāta tissa, amhehi pariharita nalāṭadhātu pūjehī’ti dhātuvamsaṃ kathetvā puttaṃ anusāsitvā kālaṃ katvā saggapuraṃ gato.

Rājā mahānāgavaro yasassi,
Katvāpi rajjaṃ matimā susaddho;
Mānetva saṅghaṃ catupaccayehi,
Agā asoko varadevalokaṃ;

Tassa putto yaṭṭalattissakumāro pitu accayena pitarā vuttaniyāmeneva dhātuyā mahantaṃ pūjaṃ kāresi. So’pi divasassa tayo vāre dhātupaṭṭhānaṃ karonto rajjaṃ kāretvā ciraṃ vihāsi. Iminā’pi patiṭṭhāpitavihārā kathetabbā; dhammasālavihāraṃ mahādhammasālavihāraṃ selābhayavihāranti evamādayo patiṭṭhāpetvā-tipīṭakamahāriṭṭhattherassa saddhivihāriko tipīṭakamahābhayatthero uparājassa mahānāgassa ayyako. Tassa therassa dakkhiṇodakaṃ adāsi. So’pi rājā yāvajīvaṃ dhātuṃ pariharitvā pacchime kāle maraṇamañce nipanno attano puttaṃ goṭṭhābhayakumāraṃ pakkosāpetvā’dhātuyā mahantaṃ pūjaṃ karonto appamatto hohī’ti vatvā dhātuvamsaṃ kathetvā kālaṃ katvā sagge nibbatti.

Yaṭṭhālako nāma mahāmahīpati,
Mahājanassatthakaro guṇālayo;
So dhātupūjaṃ vipulaṃ anekadhā,
Katvā gato devapuraṃ anindito.

Tassa putto goṭṭhābhayakumāro pitu accayena pitarā vuttaniyāmeneva dhātuyā mahantaṃ pūjaṃ katvā goṭṭhābhaya mahārājā hutvā rajjaṃ karonto kācaragāme dasabhātike rājāno ghātetvā daṇḍakammattāya goṭṭhābhayamahātherassa hatthoṭṭhajanapade vasantassa mattikalenavihāraṃ khīrasāla vihāraṃ nāgamahāvihāraṃ kumbhaselavihāraṃ cetiyapabbatavihāraṃ sānupabbatavihāraṃ kaṇikāra selavihāraṃ ambasela vihāraṃ tindukalena vihāraṃ karaṇḍakavivihāraṃ godhasālavihāraṃ vālukatitthavivihāranti evamādayo gaṅgāya paratīre pañcasatavivihāre orimatīre pañcasatavivihāre cā’ti vihārasahassaṃ kāretvā attano sadisaṇāmassa goṭṭhābhayattherassa dakkhiṇodakaṃ datvā adāsi. So yāvajīvaṃ dhātupūjaṃ katvā pacchime kāle maraṇamañce nipanno attano puttaṃ kākavaṇṇatissa kumāraṃ pakkosāpetvā āliṅgitvā;’tāta tissa, ayaṃ nalāṭadhātu amhākaṃ paramparāya āgatā. Tvaṃ kira dhātuṃ gahetvā mahāgaṅgāya passe seru nāma dahassa ante varāha nāma soṇḍiyā matthake

patiṭṭhāpetvā saṅghārāmaṃ kārāpessasī'ti satthā jīvamāno vyākaraṇamakāsi. Tasmā tvaṃ imaṃ dhātuṃ gahetvā mamaccayena tasmim̃ ṭhāne patiṭṭhāpehī'ti puttam̃ anusāsivā kālakiriyaṃ katvā sagge nibbatti.

Goṭṭhābhayo nāma mahīpatissaro,
Mahājane tosayi appamatto;
So dhātupūjaṃ vipulaṃ karitvā,
Agā asoko varadevalokaṃ.

Mahānando mahāpañño candagutto bahussuto;
Bhaddaseno mahāthero bhaddadhamme visārado.

Jayaseno ca so vīro thero so saṅgharakkhito;
Devatthero ca medhāvī rakkhakā dhātu bhaddakā.

Uparājā mahānāgo yaṭṭhālako mahābalo;
Goṭṭhābhayo mahāpuñño kākavaṇṇo ca vīriyavā.

Ete therā ca rājāno puññavanto sumānasā;
Dhātu paramparānītā dhātā dhātusukovidā.

Kassapādīnatherānaṃ paramparāyamāgatā;
Mahānāgādi hatthato yāva tissamupāgatā.

Iti ariyajanappasādanatthāya kate dhātuvam̃se

Dhātuparamparā kathā nāma

Tatiyo paricchedo.

4. Pakiṇṇakakathā

Tatra ṭhatvā rañeño uppatti kathetabbā. (So pana) amhākaṃ satthuno bodhippattito puretameva mahāmalaya raṭṭhe vanacarakam̃ paṭicca tassa bhariyāya kucchiyaṃ paṭisandhim̃ gaṇhi. Navaḍḍhamāsāvasāne mātukucchito nikkhamitvā kamena vaḍḍhanto viññubhāvaṃ pāpuṇi. Tassa pitā ekaṃ dārikaṃ ānetvā puttassa gehe akāsi. Aparabhāge tassa pitā kālamakāsi. Kumāro'carako'ti paññāyi. So tato paṭṭhāya paccekabuddham̃ upaṭṭhahi. Carako attano nivāsavatthusmim̃ kadalīpanasādīni ropetvā phalārāmaṃ akāsi. Tato aparabhāge tena ropitapanasarukkho mahantaṃ cāṭṭipamāṇaṃ panasaphalaṃ gaṇhi. Carako attano vatthum̃ gantvā sākḥāya supakkaṃ panasaphalaṃ passitvā chinditvā gehaṃ āharitvā apassāyaṃ luñcitvā upadhāresi. Tato samantā catumadhuraṃ viya yūsaṃ otaritvā apassayaṃ apanīta āvāṭaṃ pūretvā aṭṭhāsi. Tato carako evaṃ cintesi. Imaṃ panasaphalaṃ amhākaṃ paccekabuddhena vinā aññesaṃ nānucchavikanti. Paṭisāmetvā ṭhapesi.

Punadivase paccekabuddho lenato nikkhamitvā sarīrapaṭijagganaṃ katvā surattapallavasadisam̃ antaravāsakaṃ parimaṇḍalaṃ katvā nivāsetvā bahalapavaramahāpaṃsukūlacīvaraṃ pārupitvā nīlabhamaravaṇṇaṃ pattam̃ hatthena gahetvā ākāsena āgantvā tassa kuṭīdvāre pākaṭo ahoṣi. Carako kuṭito nikkhamitvā taṃ vanditvā hatthato pattam̃ gahetvā gehaṃ pavesetvā piṭhe nisīdāpetvā attanā ṭhapitaṭṭhānato panasaphalaṃ gahetvā yūsaṃ patte pūretvā paṭiggahāpesi. Paccekabuddho taṃ paribhuñjitvā ākāsato attano vasanaṭṭhānameva gato. Atheadivasam̃ carako paradesā gacchanto bhariyaṃ pakkosāpetvā;’ amma, ayyassa appamatto hutvā dānaṃ dehī'ti sabbūpakaraṇaṃ niyyādetvā paradesaṃ gato. Punadivase paccekabuddho lenato nikkhamitvā cīvaraṃ pārupitvā pattamādāya ākāsato āgantvā kuṭīdvāre otaritvā aṭṭhāsi. Tasmim̃ khaṇe carakassa bhariyā kuṭito nikkhamitvā paccekabuddhassa hatthato pattam̃ gahetvā gehe nisīdāpetvā bhattaṃ adāsi.

Tena bhattakicce pariniṭṭhite sā taruṇapaccekabuddhaṃ passitvā kilesapaṭisaṃyuttaṃ cittaṃ uppādetvā paccekabuddhassa attano ajjhāsayam kathesi. Paccekabuddho tassā kathaṃ sutvā jigucchamaṇo uppatitvā ākāso attano vasanaṭṭhānameva gato. Sā paccekabuddhassa gatakāle attano sarīraṃ telena makkhetvā bhaṇḍanakā viya nitthunamānā mañce nipajji. Carako paradeso āgantvā bhariyaṃ nipajjamānaṃ evamaṇha? Bhadde, kiṃ ayyassa bhikkhaṃ adāsī' ti. Sā nitthunamānā āha? Mā pucchā tava ayyassa kammanti. Kathehi bhadde, kiṃ tena kammaṃ katanti. So attanā saddhiṃ kilesavasne okāsaṃ kārapetum vāyamitvā mayā ayuttanti vutte mama kese gahetvā hatthapādehi ākoṭetvā sarīraṃ nakkena ottharivā sīse paharivā gato' ti vutte carako taṃ sutvā asahanto (eso mayā) evarūpassa assamaṇakammaṃ posito' ti vatvā tassā sokaṃ vinodetvā dhanuṃ ādāya tikkhasaraṃ gahetvā etaṃ māretvā āgamissāmī' ti vatvā vasanaṭṭhānaṃ agamāsi.

Tasmiṃ samaye paccekabuddho nahānatthāya gato. Gantvā ca pana kāyabandhanaṃ ākāse cīvaravaṃsaṃ viya katvā nivāsanapāpuraṇaṃ tasmiṃ ṭhapetvā jalasāṭakaṃ nivāsetvā udakamatthakā ākāse nisīditvā nahāyitum ārabhi. Carako paccekabuddhassa garugāravakāraṇaṃ passanto gumbantare nilīno aṭṭhāsi. Ṭhatvā ca pana evarūpaṃ acchariyaṃ disvā cintesi? Ayañca evarūpaṃ na karoti, addhā esā musāvādā' ti. Ahaṃ etissā vacanaṃ gahetvā evarūpassa samaṇassa akāraṇe aparādhaṃ kataṃ. Eso tādisaṃ na karotī' ti cintetvā paccekabuddhassa nahatvā ṭhītakāle gantvā pādesu nipatitvā? Mayhaṃ khamatha ayyā' ti āha. Pacceka buddho? Kiṃ kathesi upāsakā' ti. So attano mātugāmaṃ kathaṃ ācikkhi. Evañhi sati upāsaka tumhākaṃ āgatakammaṃ niṭṭhapetvā gantum vaṭṭatī' ti āha. Mā evaṃ kathetha sāmī, ahaṃ aññābhāvena tassā vacanaṃ gahetvā tumhākaṃ akāraṇe dubbhitum āgatomi' ti sabbam attanā cintitaṃ ācikkhi.

Paccekabuddho? Āma upāsaka, sā attanā saddhiṃ asaddhammapaṭisaṃyuttakathaṃ kathesi' ti āha. So tassā kujjhivā ahaṃ etaṃ nissāya imassa aparajjhāmi. Gantvā taṃ māressāmī' ti paccekabuddhaṃ pañcapaṭiṭṭhitena vanditvā nikkhami. Paccekabuddho taṃ nivattetvā mātugāmaṃ mā mārehi' ti anekavidhāni kāraṇāni kathetvā pañcasīle paṭiṭṭhapetvā tassa dhammaṃ desento imaṃ gāthamaṇha?

Yo appaduṭṭhassa narassa dussati,
Suddhassa posassa anaṅgaṇassa;
Tameva bālaṃ pacceci pāpaṃ,
Sukhuma rajo paṭivātaṃva khitto' ti;

Carako tassa dhammadeśanaṃ sutvā pasantacitto hutvā pañcapaṭiṭṭhitena vanditvā geḥaṃ gantvā tāya saddhiṃ samaggavāsaṃ vasitvā tato paṭṭhāya yāvajīvaṃ paccekabuddhassa cīvarapaṇḍapātasenaṇāsanagilānapaccayabhesajjaparikkhārādayo parikkhāre ca datvā paṭijaggi. So tasmiṃyeva lene vasanto aparabhāge anupādisesāya nibbānadhātuyā parinibbāyi.

Sayambhuñṇena vigayha dhammaṃ,
Dukkhaṃ anantaṃ sakalaṃ pahāya;
Samādhijhānābhīrato yasassi,
Gato vināsaṃ pavaro yasassi.

Atha pacchā carako kālaṃ katvā sagge nibbatti. Tattha ciraṃ dibbasampattiṃ anubhavitvā devalokato cavitvā imasmiṃ dīpe malaya raṭṭhe amaruppala lenassa āsannaṭṭhāne upacarakassa putto hutvā nibbatti. So navamāsaddhāpariyosāne mātukucchito nikkhami. Tassa nāmagahaṇadivase ñātakā amaruppala kumārōti nāmaṃ akaṃsu. So pana aparabhāge vaḍḍhento dārakehi saddhiṃ kīlanto pattapuṭeṇa vālukabhattaṃ pacitvā, dārakā ime samaṇāti vatvā paṭipāṭiyā nisīdāpetvā dānaṃ dassāmī' ti vatvā kīlādānaṃ deti. Ekadivasaṃ amaruppala kumārō vālukathupaṃ katvā attano nivāsanavattadussaṃ gahetvā khuddakadaṇḍake bandhitvā paṭākaṃ katvā pūjanaṭṭhāya ṭhapesi. Amaruppala lenavāsī maliya devattheraṃ nissāya dānādīni puñṇāni katvā tato cuto imasmiṃyeva dīpe mahāgāme goṭṭābhayaṃmahārājassa aggamahesiyā kucchimhi paṭisaṇḍhiṃ gaṇhi. So navamāsaddhāpariyosāne mātukucchito nikkhami. Tassa nāmagahaṇa divase' kākavaṇṇatisso' ti nāmaṃ akaṃsu. So anupubbena vaḍḍhitvā pitu accayena chattaṃ ussāpetvā kākavaṇṇatisamāhārājā ahoṣi. Tassa chatte ussāpityeva sakalapaṭṭhaṃ subhikkhaṃ ahoṣi. Pañca vā dvādasa vā divase

anatikkamitvā devo sammā vassati. Vessantarabodhisattassa dānagge yācakānaṃ hatthe bhikkhābhājanam viya tasmim kāle vāpīpokkharāṇī-nadī-kandara-sobbha-jātasarādayo vassodakena pūrītā ahesuṃ. Pañcavidhapaḍumasañchannā anekadijasamākiṇṇā nānārukkhehi virocītā ahesuṃ. Nānā sassāni sampajjimsu, uttarakuru ālakamandā rājadhānisadisamva hiraññasuvaṇṇādi ratanaṭṭhānaṃ.

So rājā saddhāya sampanno mahābhikkhusaṅghassa cattāro paccaye anūnaṃ katvā dāpesi. Saṭṭhimattānaṃ tipīṭakadharānaṃ candanadoṇiyā satapākatelessa pūrāpetvā yāvapiṭṭhipādaṃ tāva osīdāpetvā nisinnānaṃ laṭṭhima dhudantakaṭṭhaṃ catumadhuraṃ pakkipitvā dāpesi. Ucchukaṇḍa-sakkharā-nālikera-phalamūlakhandhakhādānañca nānāvidhamaccharasehi sugandhasālitaṇḍulena sādhitayāgubhattaṃca pātova adāsi. Antarābhatte aṭṭhārasavidha-antarakhajjakañca ucchukadalipanasaphalādayo ca nānāvidhottaribhaṅgena saddhim sugandhasālitaṇḍulabhattaṃ nānaggarasaṃ dāpetvā pacchābhattaṃ aṭṭhavidhakappiyapānake ca dāpesi. Aññe samaṇaparikkhāre ca dāpesi. Iminā niyāmeneva bhikkhusaṅghassa tipīṭakadharabhikkhūnañca nirantaraṃ mahā dānaṃ datvā vasati.

Athāparena samayena kalyāṇiyam sivo nāma mahārājā attano bhāgineyyassa abhayakumārassa kākavaṇṇatissa rañño bhaginiyā somadeviyā nāma rājaputtiyā āvāhamaṅgalaṃ katvā ānetvā pādapariṇāyikaṃ dāpesi. Datvā ca pana abhaya kumāraṃ girinagaraṃhi nisīdāpesi. So girinagare rajjaṃ kārapetvā giriabhayo nāma rājā hutvā mahantaṃ sampattiṃ anubhavamāno vihāsi. Tato aparabhāge kākavaṇṇatissa mahārājā mahāgāme viharanto aññatarassa bhikkhusaṃ gatte maṅkunā daṭṭhaṭṭhānaṃ gaṇḍaṃ uṭṭhitaṃ disvā kimetaṃ ayyā'ti pucchi. Maṅkunā daṭṭhaṭṭhānaṃ mahārājāti. Taṃ sutvā saṃvegappatto, bhante maṅkunā kismiṃ na bhavanti'ti pucchi. Paṭṭasātake na bhavanti'ti. Ime pana bhaddantā paṭṭasātake kuto labhanti'ti cintetvā gato. Taṃ divasameva pāṇiyamālake nisinno tipīṭakatissatthero nāma rañño buddhasīhanādasuttaṃ nāma kathesi. So there pasanno; uttarāsaṅge diyamāne'ekasātake bhavissāmi' tasmā imameva dātuṃ na sakkā, kathaṃ karissāmi'ti cinto therena saddhim kathayamāno tattha mālakeyeva aṭṭhāsi. Tasmim khaṇe eko kāko ambasākhantare nisīditvā

Saddaṃ karonto evamācikkhi. Ayya kākavaṇṇatissamahārāja, tumhākaṃ kaṅkhā nāma natthi, pasādakkhaṇe dhammakathikassa uttarāsaṅgaṃ dehi'ti āha.

(Kāko so kākavaṇṇassa vadeti vacanakkhāmo,
Pasādajāto therassa tuvaṃ saddhamadesane;
Dadāhi uttarāsaṅgaṃ mahātherassa bhūmipā'ti.)

Mahārāja, ahaṃ tumhākaṃ pañcasāsaṇaṃ gahetvā āgato. Vihāradevi puttaṃ vijāyī. Idamekaṃ sāsanaṃ. Ekā kareṇukā suvīrahatthipotakaṃ titthasare vijāyī. Idaṃ dutiyaṃ sāsanaṃ. Goṭṭhasamuddamajjhena sattamattā nāvā paṭṭane paccuṭṭhitā, idaṃ tatiyaṃ sāsanaṃ uttara vaḍḍhamānapabbatapāde dvikarīsappamāṇe khette taruṇatālakkhandhappamāṇā suvaṇṇakkhandhā uggacchimsu, idaṃ catutthaṃ sāsanaṃ. Giripabbatapāde koṭa raṭṭhaka vihare koṭaraṭṭhako nāma thero maggopasaṃ vatvā giripabbatamatthake sattatālapamāṇaṃ uggantvā ākāse nisinno parinibbāyī, idaṃ pañcamaṃ sāsanaṃ.

(Putto hatthi ca nāvā ca catutthaṃ hemakhandhakaṃ;
Therassa parinibbānaṃ pañcamaṃ sāsanaṃ idaṃ.

Imaṃ gahetvāna ahaṃ āgato tava santikaṃ;
Sāsanaṃ idisaṃ sutvā puññakamme rato bhava.

Vatthaṃ sahasā dāpehi kato sabbasamāgamo;
Idaṃ niccaṃ jānanto kiṃ laggo uttarāsaṅge'ti.)

Rājā kākassa vacanaṃ sutvā hasi. Thero? Kasmā mahārāja hasi'ti pucchi. Bhante, etasmim ambasākhantare nisīditvā saddaṃ karontassa kākassa kathaṃ sutvā hasinti sabbam ārocesi. Thero'pi

rañña purimattabhāve katakammaṃ passitvā hasi. Rājā kasmā ayyo hasi'ti pucchi. Mahārāja, tumhākaṃ anantare attabhāve malayarattṭhe amaruppala nāma kāle katakammaṃ passitvā hasitti. Tena puṭṭho katakusalakammaṃ sabbaṃ vitthārena tassa ācikkhi. Rājā somanassappatto attano uttarāsaṅgaṃ datvā theram vanditvā gehaṃ gato. Koṭaraṭṭhakavihāraṃ gantvā therassa sarīrajjhāpanaṃ kārāpetvā dhātuṃ ādāya cetiyaṃ kārāpetvā mahantaṃ pūjaṃ katvā mahāgāmaṃ gato. Suvannaṃ āharāpetvā rājaṅgaṇe ṭhapāpesi. Goṭhasamuddakucchiyaṃ patta nāvāto vatthāni āharāpetvā bhikkhusaṅghassa cīvaratthāya dāpetvā mahādānaṃ pavattetvā mahāgāmasamīpe vihāraṃ kārāpetvā viharanto attano puttaṃ duṭṭhagāmaṇiṃ pakkosāpetvā; tāta, tvaṃ gantvā girimhi nagare nisīdā'ti vatvā amaccañcassa pituṭṭhāne ṭhapetvā girinagaraṃ pāhesi. Taṃ disvā giriabhaya kumāro kumārena saddhiṃ āgatabaḷassa vatthāhārādīni dāpetvā mahantaṃ sammānaṃ akāsi. Rājakumāro giripabbatāpāde vihāsi.

Tato aparabhāge jātiṃ nissāya khattiyānaṃ vivādo ahosi. So abhayarājā kiṃ mevivādenā'ti attano bhariyāya somadeviyā saddhiṃ balavāhanaṃ gahetvā anukkamena gacchanto serunagare rajjaṃ kārentaṃ attasahāyaṃ sivarājaṃ sandhāya tassa santikaṃ āgañji. So'pi sivarājā giriabhayarañña saddhiṃ āgatabaḷassa mahantaṃ sakkāraṃ kāretvā ahatavatthatilataṇḍulādīni āharāpetvā dāpesi. Katipāhaccaye; samma, kasmā āgatosi'ti pucchi. So āgatakāraṇaṃ sabbamassa ācikkhi. Bhaddakaṃ samma, te kataṃ āgantabbameva āgato. Ahaṃ te kattabbaṃ jānissāmi. Tvaṃ mā cintayī'ti vatvā tassa vasanattāya nagarabhūmiṃ gavesanto sarakoṭiyaṃ atiramaṇīyabhūmiṃ passitvā tasmīṃ bhūmibhāge so nagaraṃ māpetvā deviyā ekasadanāmaṃ karissāmi'ti somanagaranti nāmaṃ akāsi. Taṃ nagaraṃ susamiddhaṃ sampannadhanadhaññādīhi upakaraṇehi dvāraṭṭālakagopuraparikhāpakkhara-ṇiyādīhi sahitaṃ hatthiassarathapattīādīhi samākulaṃ saṅkhapaṇavabherisaddādīhi samākiṇṇaṃ nagaraṃ ahosi. So abhayo ciraṃ somanagare mahantaṃ issariyaṃ anubhavanto vihāsi.

Athāparasmīṃ kāle somadevī rañña saddhiṃ kathesi; ayya amhākaṃ paṭisaraṇaṃ cetiyañca vihārañca kāretuṃ vaṭṭatī'ti. Bhaddakaṃ te kathitanti somanassappatto hutvā vihārabhūmiṃ gavesanto nagarato nātidure nāccāsanne mahantaṃ sālavanaṃ atthi. Taṃ passituṃ gato. Tadā tasmīṃ sālavane mahāriṭṭhattherassa vaṃse mahāmahindatthero nāma eko thero atthi. So saṭṭhimatte bhikkhū gahetvā viharati. Taṃ disvā iriyāpathe pasanno theram evamāha; 'ayya tumhākaṃ imasmīṃ sālavane vihāraṃ karissāmi'ti. Thero tassa vacanaṃ sutvā tuṇhīhāvena adhivāsesi. Rājā somanassappatto theram vanditvā nagarameva gantvā somadeviṃ āmantetvā; bhaddesomadevi, amhākaṃ manoratho matthakaṃ patto. Vihārakaraṇatthāya manāpo bhūmibhāgo laddho. Tattha ca mahindo nāma thero samaṇānaṃ saṭṭhimattaṃ gahetvā viharati. Taṃ vanditvā viharanattāya paṭiññaṃ gahetvā āgato. Tattha vihāraṃ karissāmi'ti āha. Sā taṃ sutvā somanassappattā sādhu'ti sampaṭicchi. Punadivase deviyā saddhiṃ therassa santikaṃ gantvā vanditvā ekamantaṃ nisīdi. Thero tesam mahāsamayasuttaṃ kathesi. Te ubho'pi dhammaṃ sutvā somanassajātā ahesuṃ. Atha rājā ayya dhātuṃ kuto labhissāmā'ti theram pucchi. Mā cintayī mahārāja, dhātuṃ amhe jānissāmā'ti ācikkhi.

So tato paṭṭhāya vihārabhūmiṃ sodhāpetvā khāṇukaṇṭakādayo nīharitvā bheritalamiva ramaṇīyaṃ samaṃ kārāpetvā iṭṭhakavaḍḍhakaṃ pakkosāpetvā iṭṭhacitaṃ kārāpetvā cetiyakammaṃ paṭṭhapesi. Vaḍḍhakī cetiyaṃ cinanto katipāhena pupphādhanattayaṃ niṭṭhapetvā dhātugabbhe sabbaṃ kattabbaṃ kammaṃ niṭṭhapetvā rañño paṭivedesi. Rājā, āgantvā therassa ārocesi. Niṭṭhāpito ayya dhātu gabbho'ti. Thero rañño vacanaṃ sutvā attanā pariharitaṃ tathāgatassa dakkhiṇadāṭhādhatuṃ tassa adāsi. Rājā dhātuṃ gahetvā sunakkhattena sumuhuttana mahatā parivārena dhātugabbhe nidahitvā atimanoramaṃ udakabubbūlakelāsakuṭapaṭibhāgaṃ cetiyaṃ kārāpesi.

Saddhādiguṇasampanno lokasāsanarakkhako;
Sacetiyaṃ mahārājā kārāpesi vihāraṃ.

Tato therassa santike saṭṭhimattānaṃ bhikkhunaṃ atthāya saṭṭhimattāni parivenāni kārāpetvā dvāraṭṭālakaṃ pākārehi sobhitaṃ vihāraṃ niṭṭhapetvā attano deviyā ekanāmaṃ katvā mahindattherassa dakkhiṇodakaṃ datvā gandhamālādihūpadhājehi pūjaṃ karonto divasassa tikkhattuṃ dhātupaṭṭhānaṃ

gantvā dānādīni puññāni kurumāno giriabhayarājā mahantaṃ sampattiṃ anubhavamāno somanagaraṃ paṭivasati.

(Nagare somanāmamhi ramaṇīye manorame;
Devīyā saha modanto rajjaṃ kāresi nāyako.)

Tato vihāradeviyā bhātā cullapiṇḍapāṭiyatissatthero nāma ekadivasam kākavaṇṇatissamahāraṇṇo āyusaṅkhāramolokento na cirappavattanabhāvaṃ ñatvā punadivase rañño santikaṃ gantvā tena saddhiṃ kathesi. Mahārāja tumhākaṃ nalāṭadhātuyā satthārā byākaraṇaṃ dinnam; mahāvālukagaṅgāya dakkhiṇabhāge seru nāma dahassa ante varāha nāma soṇḍiyā matthake anāgate kākavaṇṇatisso nāma mahārājā mayhaṃ nalāṭadhātuṃ patiṭṭhapessatī’ ti vatvā taṃ sandhāya bhagavā samāpattiṃ samāpajjitvā gato. Tassa vacanaṃ manasikarohī’ ti āha. Tassa kathaṃ sutvā amhākaṃ kusalasampattiṃ avināsetvā ayyassa vacanamuddissa cetiyaṃ kārapanattāya gantabbanti mantvā bhaddakaṃ ayyā’ ti therassa vacanaṃ sampatiṇḍhitvā attano puttaṃ duṭṭhagāmaṇiṃ girinagaraṃ pakkosāpetvā mahāgāme nisīdāpetvā nagare bheriṃ carāpesi; ahaṃ mahāvālukāya gaṅgāya samīpe seru nāma dahassa ante varāha nāma soṇḍiyā matthake cetiyaṃ kārapanattāya gamissāmi, sabbaseniyo ca mahā jano ca mayā saddhiṃ āgacchantu’ ti vatvā rājā culapiṇḍapāṭiyatissattherassa tissamahāvihāre sāgalattherassa ca santikaṃ gantvā bhante tumhākaṃ parivāre pañcasatamatte bhikkhu gahetvā dhātuṃ upaṭṭhahantā mayā saddhiṃyeva āgacchathā’ ti vatvā bhaddamāse bhaddadivase sunakkhatte sumuhutte bandhāvāraṃ sajjetvā dhātugharato dhātukaraṇḍakaṃ nīharitvā susajjitarathe ṭhapetvā upari setacchattañca katvā purato purato ratanamaṇḍape kārapetvā puretaramakāsi.

Tato rājā puttaṃ duṭṭhagāmaṇiṃ pakkosāpetvā anusāsivā puttaṃ saddhātissakumārañca vihāradeviñca gahetvā sīghaṃ nikkhami. Cūlapiṇḍapāṭiyatissatthero ca attano parivāre pañcasatabhikkhū gahetvā dhātuṃ upaṭṭhahanto pacchato āgañchi. Sabbaseniyo ca rājā ca bhikkhusaṅghassa mahādānaṃ datvā bhikkhu saṅghena saddhiṃ gantvā dīghavāpim pāpuṇṇiṃsu. Tasmim saddhātissakumāraṃ nisīdāpetvā anukkamena āgantvā sumanamālāpiṭṭhiyaṃ khandhavāraṃ bandhitvā nisīdi. Kasmā pana taṃ ṭhānaṃ evaṃ nāmakaṃ jātanti. Sumananāgarājā sattadivasāni nāgasampattiṃ abhiramamāno (nalāṭadhātuṃ vissari.) Sattāhaccayena nalāṭadhātuṃ anussaritvā pacchā āvajjamāno rañño dhātuṃ gahetvā āgatabhāvaṃ ñatvā mahantaṃ somanassaṃ patto mahantajjhāsayo attano parivāre chakoṭimatte nāge gahetvā dhātupāṭipathaṃ gantvā dhātupāṭiṭṭhitatṭhāneva pathaviyaṃ nābhippamāṇato sumanamālāvassaṃ vassesī. Tasmā taṃ ṭhānaṃ sumanamālāpiṭṭhiti jātaṃ. Punadivase rājā dhātuṃ gahetvā varāha nāma soṇḍim pāpuṇi. Sampattāya dhātuyā tasmim ṭhāne sumananāgarājā rathacakke yāva nābhiṃ tāva osīdāpetvā aparivattanaṃ akāsi. Taṃ disvā rājā saṃvegappatto theram pucchi. Mā bhāyi mahārāja, dhātu patiṭṭhānaṭṭhānaṃ āgato. Imasmim ṭhāne patiṭṭhahissatī’ ti āha.

Taṃ sutvā rājā dhātupāṭiṭṭhāna bhūmibhāgaṃ bhavissatī’ ti cintetvā tattheva senaṃnivesetvā idaṃ ṭhānaṃ samantato sakaṇṭakaṃ vanaṃ nīharāpetvā bhūmibhāgaṃ atiramaṇiyaṃ bheritalamiva samaṃ kārapetvā seniyapāmokkhaṃ āmantetvā tumhe dhātuṃ ṭhapanattāya paṭhamam dhātugharaṃ kārapetvā dhātu gabbhaṃ patiṭṭhāpetvā nivedesi. Rājā anto dhātughare tasmim dhātugabbhe dhātukaraṇḍakaṃ patiṭṭhapetvā bahi ārakkhaṃ saṃvidhāya tattha mahantaṃ pūjāvidhānaṃ kārapetvā dhātugharaṃ catujātiyagandhena vilimpāpesi. Tadupādāya taṃ gehaṃ gandhamūlaṃ nāma jātaṃ. Tasmim ṭhāne bahū sannipatiṃsu. Tattha mahindo nāma thero āgantuka bhikkhūnaṃ vattapaṭivattaṃ akāsi. Punadivase rājā vihāraṃ gantvā sukkena vasittha ayyā’ ti pucchitvā sabbe bhikkhu nimantetvā rājagehe nisīdāpetvā yāgubhattaṃ sakkaccaṃ datvā pacchā bhattaṃ anumodanaṃ sutvā nisinnakāle thero ovdanto mahārāja, pamādena vasitūṃ na vaṭṭati jīvitaṃ nāma na ciraṭṭhitikaṃ, dhātupāṭiṭṭhāpanaṃ papañcaṃ akatvā kārehi’ ti vatvā gāthamāha?

Yasmā hi jīvitaṃ nāma appaṃ bubbulakupamaṃ;
Tasmā hi paṇḍito poso kareyya kusalaṃ sadā’ ti.

Iminā nayena dhammaṃ kathetvā cūlapiṇḍapāṭiyatissa tthero ca sāgalatthero ca mahindatthero cā’ ti tayo therā attano attano parivāre bhikkhū gahetvā dhātu pariharaṇattāya āgacchiṃsu.

Vipulayaso parahitāvahanto,
 Sujanahito dhitimā avītasaddho;
 Suparivuto mahatiyā hi parisā,
 Rājaseṭṭho pavarathūpamārabhī'ti.

Iti ariyajanappasādanatthāya kate dhātuvamse

Pakiṇṇako nāma

Catuttho paricchedo.

5. Dhātunidhānādhikāro

Tato vimaṃsetvā bhumbhāgaṃ gahetuṃ vaṭṭatī'ti bhūmi bhāgaṃ vīmaṃsento maṅgalasammate aṭṭha goṇe āharāpetvā gandhodakena nahāpetvā siṅgesu suvaṇṇakañcukaṃ patimuñcāpetvā gandhapañcaṅgulikaṃ dāpetvā gīvāya mālādāmaṃ bandhāpetvā ayodāmena bandhāpetvā evaṃ cintesi? Yadi pana bhagavato nalāṭadhātu yasmiṃ ṭhāne patiṭṭhahitvā lokatthacariyaṃ karontī pañcavassasahassāni sāsanaṃ patiṭṭhahissati tasmim ṭhāne goṇā sayameva ayodāmato muñcivā thupaṭṭhānaṃ samantato vicarivā catusu disāsu sayantuti adhiṭṭhahitvā purise āṇāpesi. Te tatheva akaṃsu. Tato vibhātāya rattiyā rājāgoṇe gāhāpanatthāya āyuttake āṇāpesi. Te manussā gantvā goṇe apassivā na passāma devā'ti rañño ārocesuṃ. Gaccha bhāṇe, goṇānaṃ gataṭṭhānaṃ olokethā'ti āha. Te gavesamānā bandhanaṭṭhāne adisvā padānupadaṃ gantvā thūpakaraṇaṭṭhānaṃ samantā vicarivā catusu disāsu sayitagoṇe disvā sayitaṭṭhānato naṅguṭṭhādīni maddantāpi uṭṭhāpetuṃ asakkontā gantvā rañño ārocesu; deva, goṇā na uṭṭhahanti, ekaṃ ṭhānaṃ samantā vicarivā catusu disāsu sayitā'ti. Taṃ sutvā rājā senaṅgaparivuto sayameva gantvā'pi goṇe uṭṭhāpetuṃ asakkonto rājā evaṃ adhiṭṭhāsi; yadi imasmim ṭhāne dhātu patiṭṭhāpetabbā bhavēyya goṇā uṭṭhahitvā gacchantu'ti. Goṇā cittakkaṇeyeva uṭṭhahitvā palāyimsu. Rājā taṃ acchariyaṃ disvā pasannamano hutvā punekadivasāṃ vuttaniyāmeneva asse alaṅkārapetvā ayodāmena bandhāpetvā ṭhapesi. Assāpi te goṇā viya gantvā nipajjimsu. Rājā gantvā tatheva adhiṭṭhahitvā asse uṭṭhāpesi. Punekadivasāṃ hatthim alaṅkārapetvā tatheva adhiṭṭhāsi. Sopi bandhadāme chinditvā pacchimayāmasamanantare gantvā cetiyakaraṇaṭṭhāne nipajji. Pabhātāya rattiyā rājā hatthigopake pakkosāpetvā hatthim ānethā'ti āha. Hatthigopakā hatthim bandhanaṭṭhāne adisvā, hatthim bandhanaṭṭhāne na passāma devā'ti āhaṃsu. Tenahi bhāṇe, sīghaṃ upadhārethā'ti vutte hatthigopakā padānupadaṃ gavesamānā cetiyatṭhāne nipannaṃ hatthim disvā āgantvā rañño ārocesuṃ. Taṃ sutvā rājā heṭṭhā vuttappakārena paṭipajjitvā hatthim pure katvā āgacchi.

Evaṃ tīhi vimaṃsanāhi vīmaṃsetvā bhumiḡahitabhāvaṃ therassa santikaṃ gantvā vanditvā upaṭṭhahamāno ārocesi. Tasmim kāle serunagare sivarājā bahū paṇṇākāre gāhāpetvā rājānaṃ passissāmi'ti āgantvā vanditvā ekamantaṃ aṭṭhāsi. Rājā tena saddhim sammodanīyaṃ kathaṃ katvā nisinnakāle loṇanagare mahānāgarājā'pi bahupaṇṇākāraṃ gāhāpetvā rājānaṃ passissāmi'ti āgantvā vanditvā ekamantaṃ nisīdi. Tena saddhim sammodanīyaṃ kathaṃ akāsi; imasmim ṭhāne dasabaladhātuṃ patiṭṭhāpessāmi, tumhe mama sahāyā hothā'ti te gahetvā gantvā dhātuṃ vandathā'ti vandāpesi. Tasmim khaṇe dhātuto chabbaṇṇaramsiyo uggacchimsu. Devā sādhuḡāraṃ karontā ākāsato mālāyo khipimsu. Rājāno somanassappattā amhākaṃ laṅkāyaṃ dasabalassa nalāṭadhātu amhākaṃ raṭṭhe patiṭṭhahissati. Esā dhātu mahā janassa satthukiccaṃ sādheyyāti vanditvā gatā. Rājā tesāṃ gatakāle giriabhayaṃ pakkosāpetvā tāta, iṭṭhakaṃ janassa pīḡanaṃ akatvā kārapemā'ti āha. Mā cintayittha deva, ahaṃ iṭṭhakaṃ kārapessāmīti. Evañhi sati papañco bhavissatī'ti āha. Amhākaṃ santike suvaṇṇarajatāni mandāni kuto labhissāmā'ti vutte giriabhayo evamāha; deva, satthā mahāpuñño mahantaṃ pūjāsakkārasammānaṃ labhissati. Tvaṃ acintetvā cetiyakammaṃ paṭṭhāpehī'ti āha.

So tassa taṃ acintanīyaṃ kathaṃ sutvā somanassappatto therassa santike dhammaṃ sutvā dhātuṃ vanditvā nagaraṃ gantvā bhuttasāyamāso sayane nipanno niddaṃ okkami. Vibhātāya rattiyā pabujjhitvā iṭṭhakaṃ cintayamānassa domanassaṃ ahoṣi. Tasmim kāle sakko devarājā vissakammaṃ

devaputtam āmantetvā; tāta, vissakamma, kākavaṇṇatissamahārājā amhākaṃ satthuno nalāṭa dhātum nidahitvā mahantaṃ cetiyaṃ kārāpetukāmo iṭṭhakaṃ cintayi. Tvaṃ gantvā phāsukatṭhāne iṭṭhakaṃ māpehīti āha. Taṃ sutvā vissakammadevaputto duggatassa brāhmaṇassa khetto iṭṭhakaṃ māpetvā devalokameva gato. Tasmim̐ khaṇe khettsāmiko duggatabrāhmaṇo pātova attano khettaṃ olokanatthāya gato itovito olokeno iṭṭhakarāsiṃ disvā cintesi; hiyo rājā iṭṭhakaṃ kathaṃ labhissāmīti kathesi. Mahantaṃ vata paṇṇākāraṃ mayā laddhanti tuṭṭho devaiṭṭhakāni kājena gahetvā rañño dassanatthāya gantvā rājadvāre ṭhatvā sāsanaṃ pahīni. Taṃ pakkosāpetvā kasmā pāto'va āgatosī'ti pucchi. Deva mayham̐ khetto iṭṭhakarāsiṃ disvā pāto'va iṭṭhakāni gahetvā āgatomhī'ti. Īdisāni iṭṭhakāni cetiyassa anucchavikānīti dassesi. Rājā passitvā somanassappatto brāhmaṇassa bahum̐ dhanam̐ dāpesi.

Tasmim̐ khaṇe aññaṃ sāsanaṃ āhari. Madanapaṭṭanadvārato catasso rajatanāvā suvaṇṇabhūmito catasso suvaṇṇanāvā ukkamimsūti paṭṭanamukhadvāre viharanto ārakkhaka jetṭhako dhammapālo nāma āgantvā rañño ārocesi. Rājā tuṭṭho suvaṇṇarajate āharāpesi.

(Iṭṭhakaṃ rajatañceva suvaṇṇaṇca mahārahaṃ;
Āharitvāna taṃ sabbaṃ kammaṃ ārabhi cetiye.

Satthu puññānubhāvena rañño puññabalena ca;
Cintitacintitaṃ sabbaṃ khaṇeneva samijjhati.)

Tato rājā cūḷapiṇḍapātiyatissattherassa santikaṃ gantvā? Ayya iṭṭhakabhūmiṃ gamissāmīti āha. Thero sutvā tuṭṭho attano parivārehi pañcasatbhikkhūhi saddhiṃ iṭṭhaka bhūmiṃ gato. Tato mahāsāgalatthero ca mahindatthero ca attano parivārehi bhikkhuhi saddhiṃ iṭṭhakabhūmiṃ gatā. Siva nagare rājāpi iṭṭhakabhūmiṃ gato. Loṇanagare nāgarājāpi iṭṭhakabhūmiṃ gato. Somanagare giriabhayarājāpi attano senaṅgehi parivāretvā iṭṭhakabhūmiṃ gato. Tesam̐ samaṇa brāhmaṇānaṃ rājabaḷānaṇca sampiṇḍitattā so piṭṭhipāsāṇo balavāhano nāma jāto. Te sabbe iṭṭhakabhūmiṃ samosariṃsu. Thero iṭṭhakarāsiṃ oloketvā rājānaṃ evamāha? Mahārāja, ayaṃ iṭṭhakarāsi cetiye sabbakammattāya pahotī'ti. Rājā attamano senaṅgaparivuto sayameva paṭhamam̐ iṭṭhakaṃ gaṇhi. Taṃ disvā sesarājāno ca amaccādayo ca parisā ca sabbe bhikkhu ca iṭṭhakāni gaṇhiṃsu tasmim̐ kāle bhāraṃ ukkhipitvā gamanaṃ papañcaṃ bhavissatī'ti rājā cintesi. Thero tassa cittaṃ jānitvā evamāha? Mā cintayittha mahārāja, iṭṭhakāni gahetvā gaccha. Pacchā devanāgādayo iṭṭhakabhūmito paṭṭhāya yāva cetiyatṭhānaṃ nirantarā ṭhitā āharissantī'ti. Te āharitvā cetiyatṭhāne rāsiṃ karontī. Teneva nīyāmena yāva cetiyassa niṭṭhaṅgamā tāva devanāgasupaṇṇādayo nirantaram̐ ṭhatvā iṭṭhakāni āharitvā cetiyakaraṇatṭhāneva catusu disāsu rāsiṃ akaṃsu.

Tato rājā sabbe iṭṭhakavaḍḍhakī rāsiṃ kārāpetvā tesam̐ vaḍḍhakīnaṃ antare jayasenaṃ nāma iṭṭhakavaḍḍhakaṃ parigaṇhitvā tassa pana satahassagghanakāni dve sātākāni kahāpaṇasatasahassāni ca suvaṇṇakuṇḍalādayo ābharaṇāni ca dāpesi. Tassa parivārānaṃ vaḍḍhakīnaṃ ahatavattḥādīni sabbupakaraṇāni dāpesi. Anekavidham̐ mahantaṃ sammānaṃ kāretvā therena saddhiṃ mantento; ayya ajja visākhapuṇṇamī uposathadivaso, tasmā nalāṭadhātuyā maṅgalaṃ karitvā cetiyatṭhāne iṭṭhakaṃ patitṭhāpetum̐ vaṭṭatī'ti āha. Taṃ sutvā thero; bhaddakaṃ mahārāja, buddhassa bhagavato jātadivaso'ti vatvā cetiyakammakaraṇatṭhāya pañca jane gaṇhi. Tesu eko varadevo nāma, eko saṅkho nāma, eko vijjo nāma, eko pussadevo nāma, eko mahādevo nāma. Imesam̐ vaḍḍhakīnaṃ maṅgalaṃ kārāpetvā chaṇavesam̐ gahetvā sabbālaṅkārena alaṅkāretvā rājā sayampi sabbālaṅkārena patimaṇḍito maṅgalavidhānaṃ kārāpetvā bhikkhusaṅgham̐ gandhamālādīhi pūjetvā tikkhattum̐ padakkhiṇam̐ katvā catusu ṭhānesu pañcapatitṭhitena vanditvā vijamhetvā suvaṇṇaghatṭhānaṃ pavisitvā suvaṇṇakhacitaṃ maṇimuttāratanaṃ paribbhamanaḍḍam̐ jīvamānakamātāpitarena ubhatosumaṇḍitapasādhitena abhimaṅgalasammattena amaccaputtana gāhāpetvā mahantaṃ cetiyaṃ tattha karonto sayampi paribbhamanaḍḍam̐ gahetvā parikammakatabhūmiyam̐ paribbhamitvā ekamantaṃ atṭhāsi. Tato mahāvaḍḍhakī sunakkhattena sumuhuttana cetiyatṭhāne iṭṭhakaṃ patitṭhāpesi.

Tasmim̐ khaṇe catunahutādhika dviyojana satahassabahulā ayaṃ mahāpathavī sādhuḥkāraṃ pavattentī viya mahānādaṃ pavattesi. Devamanussā divase divase pahonaka-mattikaṃ nisadena

pimsitvā suppehi papphoṭhetvā denti. Evaṃ karonto katipayeneva divasena pupphādhānattayaṃ cinitvā mahābhikkhu saṅghassa nivedesi. Taṃ sutvā saṅgho cunduttaranāmake dve sāmaṇere āṇāpesi? Tumhe himavantam gantvā medavaṇṇapāsāṇe āharathā'ti. Te pana sāmaṇerā jātiyā soḷasavassikā chaḷabhiññāppabhedena paṭisambhidappattā. Mahākhīṇāsavabhikkhusaṅghassa santikā bhikkhusaṅghassa vacanaṃ sampatiṇchitvā ākāsaṃ abbhuggantvā himavantato attano iddhibalena medavaṇṇapāsāṇe āharimsu. Etesu ekaṃ pāsāṇaṃ dhātugabbhassa bhumiyaṃ pattharivā catusu passesu cattāro pāsāṇe patiṭṭhāpetvā aparaṃ dhātugabbhaṃ pidahituṃ adassanaṃ katvā ṭhapayimsu.

Tadā rājā dhātugabbhe kammaṃ niṭṭhapento nava koṭṭipamāṇaṃ suvaṇṇaṃ āharāpetvā suvaṇṇakārānaṃ datvā dhātugabbhassa iṭṭhakāni karoṭhā'ti āṇāpesi. Te suvaṇṇakārā dīghato ratanappamāṇaṃ puthulato vidatthippamāṇaṃ bahalato caturaṅgulappamāṇaṃ iṭṭhakaṃ katvā dhātugabbhaṃ cinimsu. Taṃ pana dhātugabbhaṃ uccato soḷasahatthaṃ vitthāratopi itocito dasadasaratanaṃ katvā suvaṇṇiṭṭhakeheva niṭṭhapetvā dhātugabbhassa majjhe sattaratanamayaṃ sineruṃ kārāpetvā sinerussa upari jātihiṅgulakena paṇḍukambalasilāsanaṃ sattaratanena pāricchattakarukkaṃ rajatamayaṃ setacchattaṃ brahmunā gāhāpetvā satthuno paṭimāya upari dhāriyamānaṃ kāresi. Sinerupādamūle gandhakalalapūrita nīluppavibhusitasuvaṇṇamayaatṭhuttarasataghaṭapantiyo ṭhapāpesi. Tadanantaraṃ gandhakalalapūritaratnapadumavibhusitarajatamayaatṭhuttara- sataghaṭapantiyo ṭhapāpesi. Tadanantaraṃ gandhakalalapūrita setuppalamālāvibhusitamaṇimayaatṭhuttarasataghaṭapantiyo ṭhapāpesi. Tadanantaraṃ gandhakalalapūritasetuppavibhusita-masāragallamaya atṭhuttarasataghaṭapantiyo ṭhapāpesi. Tadanantaraṃ gandhakalalapūritacampakapupphavibhusitalohitaṅkamayaatṭhuttarasata ghaṭapantiyo ṭhapāpesi. Tadanantaraṃ gandhakalalapūritapañcuppalavibhusitamattikāmayaatṭhuttarasataghaṭapantiyo ṭhapāpesi. Tāsaṃ ghaṭapantiṇaṃ antare gandhakalalapūritasattaratanamayasarāvake ṭhapāpesi. Kañcanaṃmāya-sattaratanamāya-vicittamālālatāpuṇṇaghaṭasirivacchanandiyāvaṭṭabhaddapīṭhādayo ca hatthiassasihavyagghosabhapantiādayo ca kāresi. Devorohaṇaṃ yamakapāṭihīrādayo dhanapāla- aṅgulimāla-āḷavakadamaṇādayo, sārīputta-moggallāna-mahākassapattherādayo, asītimahāsāvakarūpādīni ca kārāpesi. Sinerussa majjihimbhāge tārāgaṇaparivāritam rajatamayaṃ candamaṇḍalaṅca kārāpesi. Raṃsijālavibhusitaṃ kanakamayaṃ sūriyamaṇḍalaṅca kārāpesi.

Tato sinerussa matthake pāricchattakamule paṇḍukambalasilāsane amhākaṃ satthuno paṭimaṃ ghanakoṭṭima rattasuvaṇṇamayaṃ kārāpetvā mātudevapāmokkha dasasahassa cakkavāḷadevatānaṃ sattappakaraṇaṃ abhidhammaṃ desanākārena nisīdāpesi. Tassa vīsatinakhā akkhitalānaṃ setaṭṭhānāni jātiphalikamayāni. Aṅguliyo suvaṇṇamayā hatthapādatalāni ca dantāvarenaṃni ca akkhīnaṃ rattaṭṭhānāni ca jātipavāḷamayāni, kesamassubhamukaṭṭhānāni indanīlamayāni, samacattālīsa dantā vajiramayā ahesuṃ. Uṇṇalomaṃ pana suvaṇṇa bhittiyaṃ ṭhapitarajatabubbuḷavilāsaṃ rajatamayaṃ ahosi. Bhagavato anavalokita muddhani matthake sattaratanamayaṃ vicittakiṃkiṇijālaṃ parikkhipāpesi. Maṇḍapassa anto navasatasahassagghanakaṃ muttākālāpamolambakaṃ manoramaṃ celavitānaṃ bandhāpetvā maṇḍapakoṭiyaṃ muttājālaṃ tadanantaraṃ satta ratanaviccittaṃ kiṃkiṇijālaṃ parikkhipāpesi.

Amhākaṃ bhagavato mātudevaputtampi sattaratanena kārāpesi. Tathā erāvaṇavissakammadevaputtādayo ca saporivāro sakko devarājā ca cattāro mahārājāno ca pañcasikhadevaputtādayo gandhabbadevaputtā ca sahampati mahā brahmādayo mahābrahmano ca kārāpesi. Vessantarajātakaṃ karonto saṃjayamahārājā phusatīdevī ādayo ca maddīdevī dve dārake ca jūjakabrāhmaṇādayo ca kārāpesi. Vidhura-soṇadatta mahānāradakassapa-sutasoma-supparaka-saṅkhapālajātakādīni ca, dhammacakkappavattana-mahāsamayasuttādi desanākāro ca, suddhodanamahārājā mahāmāyā mahāpajāpatī gotamī bhaddakaccānā rāhulamātādevī ca rāhulakumāro ca channaṅca kanthakaṅca mahābhinnikkhamaṇaṃ mahābodhimaṇḍalaṃ asītimahāsāvakā kosalamahārājā anāthapiṇḍikamahāseṭṭhi cūlaanāthapiṇḍika-visākhā supavāsā ca pacchā cūlapiṇḍapātiya tissattheraṅca attānaṅca kārāpetvā te sabbe dhātu gabbhe patiṭṭhāpesi.

Dhātugabbhavaṇṇaṇā samattā.

Evaṃ dhātugabbhe pūjāvīdhānaṃ suvibhattaṃ sumanoramaṃ kārāpetvā therena saddhiṃ

kathesi? Bhante dhātugabbhe mayā kattabbaṃ niṭṭhāpitaṃ. Sve rohiṇīnakkhattena dhātu nidhānaṃ karissāmi. Ayyā pana kesadhātuyo gahetvā āgacchantuti. Tissattherassa bhāramakāsi. Thero taṃ sutvā bhaddakaṃ mahārāja, kesadhātuyo vicinitvā āharāpessāmāti vatvā attano saddhivihārikaṃ sivattheraṃ pakkosāpetvā āvuso bhūmindharanāgavimāne jayaseno nāma nāgarājā vasati. Tassa santike (kesadhātuyo santi.) Tapussa bhallikānaṃ dvebhātikavāṇijānaṃ paricaraṇakāle tesam pamādaṃ ñatvā nāgarājā dve kesadhātuyo gahetvā nāgabhavane ṭhapesi. Tvaṃ tā dhātuyo āharitvā rañño dehīti āṇāpesi. Thero taṃ vacanaṃ sampaṭicchitvā gato.

Tato rājā attano bhaginiyā somadeviyā ca bhāgineyyassa giriabhayarañño ca sāsanaṃ pesesi? Sve dhātunidhānaṃkarissāma. Tumhe senaṅgaṃ gahetvā āgacchathā' ti. Loṇanagare mahānāgarāñño ca seru nagare sivarāñño ca tatheva sāsanaṃ pesetvā sayampi attano vijite yena mayhaṃ hatthato antamaso ekakarīsamattampi laddhaṃ tadupādāya sabbe pi tumhe saddhiṃ parivārena āgacchathā' ti bheriṃ carāpesi. Taṃ sutvā somanassappattā mahājanā attano attano vibhavānurūpena alaṅkatapaṭiyattā agamiṃsu. Rājā pabhātāya rattiyā sabbe seniyo gandhamālādhūpadhajādayo gahetvā dhātunidhānaṃ āgacchantuti vatvā bhikkhusaṅghassa mahādānaṃ datvā tivīvaratthāya mahagghavatthādāni datvā sayampi sabbālaṅkārapatimaṇḍito nānaggarasabhojanaṃ bhuñjitvā uposathaṃ adhiṭṭhāya maṇikuṇḍalamekhalānūpura valayādivicittasabbālaṅkāravibhūsitāhi koseyyādisukhumanānāvidhavicittavatthanivatthāhi naccagītavādituriyabhaṇḍagahita hatthāhi devaccharāpaṭibhāganāṭakittīhi parivārito vuttappakārehi saddhiṃ cetiyatṭhānaṃ gantvā mahābhikkhusaṅghaṃ vanditvā aṭṭhāsi.

Tato somanagare giriabhayarājā' pi sabbe nāgarā attano attano vibhavānurūpena dhātunidhānatṭhānaṃ āgacchantuti nagare bheriṃ carāpetvā sayam sabbālaṅkārapatimaṇḍito susajjitaamaccagaṇaparivārito nikkhami. Soma devīpi sīsaṃ nahātvā ahatavatthanivatthā sabbālaṅkārapatimaṇḍitā devaccharā viya attano parivārā pañcasatakumāriyo nīlavatthehi paridahāpetvā tatheva alaṅkāretvā puṇṇaghaṭe gāhāpetvā tāsam anantarā pañcasatakumāriyo pītavatthehi paridahāpetvā tatheva alaṅkāretvā pūjābhaṇḍāni gāhāpetvā, tāsam anantarā pañcasata kumāriyo rattavatthehi paridahāpetvā tatheva. Alaṅkāretvā vicitrapupphapūritamañjusāyo gāhāpetvā tāsam anantarā pañcasatakumāriyo setavatthehi paridahāpetvā tatheva alaṅkāretvā dhūma kaṭacchuke gāhāpetvā evaṃ pūjāvidhānaṃ saṃvidahitvā parivārena cetiṅgaṇaṃ gantvā mahābhikkhusaṅghaṃ pañcapaṭiṭṭhitena vanditvā gandhamālādīhi pūjaṃ katvā attano sāmīnā giriabhayarājena saddhiṃ ekapasse ṭhītā.

Loṇanagare mahānāgarājā' pi sabbālaṅkārehi patimaṇḍito sabbābharaṇehi susajjitaamaccamaṇḍalaparivuto naccagītaturiyāni paggaṇhāpayamāno gandhamālā dhūmakaṭacchu gāhāpetvā cetiyatṭhānaṃ āgantvā bhikkhusaṅghaṃ vanditvā ekamantaṃ aṭṭhāsi.

Serunagare sivarājā' pi attānaṃ sabbālaṅkārehi alaṅkaritvā mahantena parivārena pūjāvidhānaṃ gāhāpetvā cetiyatṭhānaṃ āgantvā mahābhikkhusaṅghaṃ vanditvā ekamantaṃ aṭṭhāsi. Rājaparīsā attano vibhavānurūpena vatthālaṅkārehi candana mālādīhi ca sobhamānā nalāṭe muttākālapamolambaka vicittasuvaṇṇapaṭṭāni bandhitvā hatthābharaṇādi anekābharaṇehi dibbaparīsā viya sumaṇḍitapasādhitā vesānurūpāni vividhāvudhāni gahetvā ekapasse ṭhītā. Sīhavyagghadīpicammehi pasādhitasuvaṇṇālaṅkārasuvaṇṇadhajahemajālasaṅgāne ratha vare ca sabbālaṅkāravibhūsitā rathikā āruya ekapasse ṭhītā. Brāhmaṇaputtādayo maṇḍitacamme pārupitvā upasobhayamānā ekapasse ṭhītā. Bahu amaccā attano attano vesānurūpena mahagghavatthābharaṇavibhūsitā sapaṭivārā ekapasse ṭhītā. Gandhodaka pūrita dakkhiṇāvatta saṅkhaṃ gahetvā upavītasuttaṃ ekamsaṃ karitvā brāhmaṇaveṭhanaṃ veṭhetvā purohitabrāhmaṇā mahantena parivārena pūjāvidhānaṃ gāhāpetvā cetiyatṭhānaṃ āgantvā mahābhikkhusaṅghaṃ vanditvā jayagosaṃ sāventā evamāhaṃsu?

Khemaṃ subhikkhaṃ bhavatu niccaṃ janapadaṃ sivaṃ;
Sassāni samuppajjantu rañño evaṃ jayā siyaṃ.

Avasesā mahājanā evamāhaṃsu? Samuddapariyantaṃ hi mahiṃ sāgarakuṇḍalaṃ vasundharaṃ āvasatu amaccaparivārito. Evaṃ vatvā? Amhākaṃ ayyo kākavaṇṇatisso mahā rājā sadevake loke

ekapuggalassa lokanāthassanalāṭadhātuṃ patiṭṭhāpeti'ti attano attano vibhavānurūpena
 sumaṇḍitapasādhitā. Khujjavāmanakādayo'pi sabbe janā pūjābhaṇḍāni gahetvā sādhuḥkāraṃ
 dadamānā aṭṭhaṃsu. Imasmiṃ cetiyatṭhāne rāsibhūtā parisā evaṃ veditabbā? Khattiyā brāhmaṇā
 vessā negamā ca samāgatā pupphādigahitā sabbe alaṅkāravibhūsitā.

Gaṇanā vītivattā te aneke ca mahājanā;
 Samuddo pattharantova khattiyā samupāgatā.

Alaṅkato mahārājā sarājaparivārito;
 Devarājā yathā sakko aṭṭhāsi cetiyaṅgaṇe.

Sādhuvādena sattānaṃ pañcaṅgaturiyehi ca;
 Hatthassarathasaddena samākiṇṇaṃ mahītaṃ.

Tato cūḷapīṇḍapātiyatissatthero attano saddhivihārike pañcasata khīṇāsava parivāretvā
 cetiyatṭhānameva āgato. Mahāsāgalatthero'pi pañcasata khīṇāsava parivāretvā cetiyatṭhānameva
 āgato. Mahindatthero'pi attano sāvake saṭṭhimatte khīṇāsava gahetvā cetiyatṭhānameva āgato. Iti
 iminā niyāmeneva eko dve tayo cattāro pañca khīṇāsavā āgacchantā satta saḥassamattā ahesuṃ. Tato
 cūḷapīṇḍapātiyatissatthero ettake bhikkhū parivāretvā cetiyaṅgaṇe nisīdi. Tato rājā āgantvā
 pañcapatiṭṭhitena vanditvā therena saddhiṃ kathesi? Kesadhātu kuto labhissāma ayyā'ti. Tasmīṃ
 khaṇe tissatthero attano saddhivihārikaṃ sivattheraṃ olokesi. So olokitakkhaṇeyeva nisinnatṭhānato
 utṭhāya cīvaraṃ pārupitvā mahābhikkhusaṅghaṃ vanditvā chaḷabhiñño mahākhīṇāsavo
 catutthajjhānaṃ samāpajjitvā tato vuṭṭhāya pathaviyaṃ nimujjitvā bhumindharanāgavimāne
 pāturaḥosi.

(Sutvāssa sivathero ca vasippatto visārado;
 Pākaṭo abhavi nāganagaraṃ purato khaṇe.)

Tasmīṃ kho pana samaye jayaseno nāgarājā attano bhāgineyyaṃ dvikoṭimatte nāge parivāretvā
 mahā yasaṃ anubhavamaṇaṃ nisinnaṃ iṅgitasaññaṃ datvā therāṃ duratova āgacchantāṃ disvā
 cintesi? Imasmiṃ nāgabhavane samaṇehi kattabbakiccaṃ natthī. Nissaṃsayāṃ kesadhātuṃ nissāya
 āgato bhavissatīti utṭhāya dhātugharaṃ pavisitvā dhātukaraṇḍakaṃ gilitvā kiñci aṅānanto viya nisīdi.
 Tasmīṃ kāle thero tassa santikaṃ agamāsi. Nāgarājā paccuggantvā paṭisanthāraṃ karonto therena
 saddhiṃ kathesi. Kasmā ayyo āgato'ti vutte evamāha? Tilokanāthassa amhākaṃ sambuddhassa
 kesadhātūnaṃ atthāya āgato, tuyhaṃ santike ṭhapitakesadhātuyo papañcaṃ akatvā mayhaṃ dehi,
 teyeva sandhāya upajjhāyena pesitomhī'ti vutte amhākaṃ sammā sambuddhassa kesadhātuyo mama
 santike natthī'ti āha. Thero dhātukaraṇḍakaṃ gilitabhāvaṃ ṇatvā gaṇhāmi mahārājā kesadhātuyo'ti
 vutte āma passanto gahetvā gacchāhīti āha. Evaṃ tayo vāre paṭiññaṃ gahetvā tatheva ṭhīto?

Iddhiyā māpayitvāna tato so sukhumāṃ kamaṃ,
 Pavesetvā mukhe tassa gaṇhī dhātukaraṇḍakaṃ;
 Nāgālayābhinnikkhami tiṭṭha nāgā'ti bhāsiya.

Tasmīṃ khaṇe jayaseno nāgarājā samaṇaṃ vañcetvā pesitomhī'ti vatvā tassa gatakāle
 dhātukaraṇḍakaṃ oloketvā dhātu apassitvā samaṇena nāsitomhī'ti dve hatthe ukkhipitvā ṭhapetvā
 attano sakalanāgabhavanaṃ eka kolāhalaṃ katvā mahantena saddena paridevanto? Amhākaṃ
 cakkhuni uppāṭetvā gato viya sadevakassa lokassa patiṭṭhānabhūtassa sammāsambuddhassa
 kesadhātuyo apāyadukkhatō amuñcantānaṃ amhākaṃ abhibhavitvā dhātuyo gahetvā gatasamaṇaṃ
 anubandhitvā gaṇhissāmā'ti dvekoṭimatte nāge gahetvā attano bhāgineyyena saddhiṃ tassa piṭṭhito
 piṭṭhito anubandhitvā ākāsaṃ uggacchiṃ (su). Tasmīṃ khaṇe pana sivatthero akāsato otaritvā
 pathaviyaṃ pāvīsi. Puna tepi pathaviyaṃ pavisiṃsu. Evaṃ thero tehi saddhiṃ ummujja nimujjaṃ
 karonto pāṭihāriyaṃ dassetvā serunagarassa nātīdūre piṭṭhipāsāṇe uggañji. Tattheva te saṃvejetvā
 cetiyaṅgaṇe mahābhikkhusaṅghassa purato pākaṭo ahoṣi. Nāgā taṃ gahetuṃ asakkontā mahantena
 saddena ravaṃ patiravaṃ datvā. Ito paṭṭhāya natṭhamhā'ti tasmīṃ piṭṭhi pāsāṇe sabbe samāgamaṃ
 katvā mahāsaddena parideviṃsu? Natṭhambhā vata bho'ti. Tato paṭṭhāya so piṭṭhipāsāṇo nāgānaṃ

ravaṃ patiravaṃ datvā paridevitahāvena nāgagallaṃ nāma ahoṣi.

Nāgo therassa piṭṭhitoyeva anubandhitvā cetiyaṅgaṇaṃ gantvā rājānaṃ evamāha? Deva, eso bhikkhu mayā adinnadhātu gahetvā āgato'ti. Taṃ sutvā rājā? Saccaṃ kira ayya nāgassa vacananti vutte naheva mahārāja, iminā dinnam eva dhātuṃ aggahesinti vutte? Nāgo tava sakkhiṃ dehīti āha. Thero tassa bhāginyeṃ samaṇuppara nāgarājānaṃ sakkhiṃ akāsi. Rājā tassa bhāgineyyassa sabbavacanāṃ sutvā saddahi. Tasmim kāle dukkhābhībhūto nāgarājā gantvā bahi ṭhīto. Tato paṭṭhāya so nāgarājā bahi hutvā nisinnattā bahināgarājā nāma ahoṣi. Tassa pana bhāgineyyaṃ anto cetiyaṅgaṇe nisīdāpesi. Imassa pana cetiyassa ārakkhaṃ gahitanāgā kathetabbā. Sumananāgarañño parivārā chakoṭimattā nāgā, jayasenassa parivārā koṭisatamattā nāgā, samaṇuppara nāgarañño parivārā dvikoṭimattā nāgā ahesuṃ. Sabbe dhātuyā ārakkhaṃ gaṇhiṃsu. Rājā therassa hatthato kesadhātuṃ gahetvā ratanacāṇegātake ṭhapetvā mahindassa nāma amaccassa adāsi. Tasmim samāgame tipīṭakamahāphussadevattherassa saddhivihārikā paṭisambhidappattā cattāro sāmaṇerā ahesuṃ. Tesu eko malaya rājaputto sumanasāmaṇero nāma, eko serunagare sivarājabhāgineyyassa putto uttara sāmaṇero nāma. Eko mahāgāme mālākāraputto cunda sāmaṇero nāma eko mahāgāme ekassa kuṭumbikassa putto mahākassapasāmaṇero nāma, ime cattāro sāmaṇerā ajja kākavaṇṇatissamahārājā mahācetiye dhātu nidhānaṃ karissati, mayaṃ himavantaṃ gantvā sukusumāni āharissāmāti theram vanditvā ākāsato himavantaṃ gantvā campakanāgasalalādayo pūjanīyamālaṃ gahetvā tāvatimsadeva lokaṃ gatā.

Tasmim kāle sakko devarājā sabbābharaṇapatimaṇḍito dvisu devalokesu devatāyo gahetvā erāvaṇahatthikkhandhamāruya aḍḍhateyyakoṭidevaccharāparivārīto sudassanamahā vīthiyā vicaranto savaṅgoṭake te cattāro sāmaṇere duratova āgacchante disvā hatthikkhandhato oruya pañca patiṭṭhitena vanditvā tesam hatthe mālācāṅgoṭake disvā? Kiṃ ayyā tumhākaṃ hatthe'ti pucchi. Taṃ sutvā sāmaṇerā mahārāja, kiṃ tvaṃ na jānāsi. Laṅkāyaṃ kākavaṇṇatissa mahārājā dasabalassa nalāṭadhātuṃ gahetvā mahāvālukagaṇāgāya dakkhiṇapasse seru nāma dahassa ante varāha nāma soṇḍimatthake cetiyam kārapetuṃ tumhākaṃ niyogena vissakammadevaputtena nimmitaiṭṭhakāni gahetvā cetiyam kārapetvā ajja dhātunidhānaṃ karoti. Tattha pūjanatthāya himavantato ānītapupphamidanti vatvā itopi kusumaṃ gahetuṃ āgatamhā'ti vadiṃsu. Sakko tesam vacanaṃ sutvā?

Ayya tumhākaṃ hatthe pupphāni cūlāmaṇicetiye pujetvā amhākaṃ uyyānato pupphāni gahetvā gacchathāti vatvā tehi saddhiṃ gantvā tesam pupphehi cūlāmaṇicetiyaṃ pūjesi. Tato papañcaṃ na bhavitabbanti sakkassa nivedesuṃ. Taṃ sutvā sakko sāmaṇerānaṃ pañcamahāuyyānato pāricchattakoviḷārādīni pupphāni ca candanacuṇṇaṇca gahetvā dāpesi. Sāmaṇerā pupphāni gahetvā devalokato otarivā himavantaṃ pavisitvā suvaṇṇamaṇipabbate santacchāyāya nasīditvā divāvihāraṃ katvā nakkhattavelāya sampattāya maṇi gavesamānā cattāro maṇayo addasaṃsu. Tesam eko indanīlamaṇi, eko pahassarajotiraṅga maṇi, eko veluriyamaṇi, eko masāragallamaṇi, cattāro maṇayo ca dibbapupphāni ca gahetvā therānaṃ dassesuṃ. Thero? Mahārāja, ime sāmaṇerā pāricchattakoviḷārādīni pupphāni ca candanacuṇṇaṇca cattāro maṇayo ca gahetvā āgatā'ti rañño ārocesuṃ.

Rājā taṃ sutvā somanassajāto sāmaṇere pañca patiṭṭhītena vanditvā tesamāhatamaṇayo gahetvā mahānanda nāma amaccassa datvā therehī saddhiṃ mahantena parivārena cetiyaṅgaṇaṃ gantvā maṇikaraṇḍakena dhātuṃ gahetvā attano sīse dhātuṃ ṭhapetvā upari setacchattaṃ kārapetvā cetiyam tikkhattuṃ padakkhiṇaṃ katvā pācīnadvāre ṭhīto? Ayaṃ dasabalassa nalāṭadhātu amhehi kārapitāya buddhapaṭimāya nalāte uṇṇalomākāraṃ hutvā patiṭṭhahatūti adhiṭṭhāsi. Tassa cintitakkaṇe yaeva dhātu karaṇḍato nabhamuggantvā ākāse sattatālappamaṇe ṭhatvā chabbaṇṇa raṃsiyo vissajjesi. Tā raṃsiyo kuṭena āsiṅcamānavilīna suvaṇṇaṃ viya antalikkhato nikkhantasuvaṇṇarasadhārā viya sakalalaṅkāḍīpaṃ raṃsijālehi ekobhāsaṃ katvā gaṇhiṃsu. Tasmim kāle yamakapāṭihāriyasadisam pāṭihāriyaṃ ahoṣi. Mahākāruṇikassa bhagavato adīṭṭhapubbaṃ pāṭihāriyaṃ disvā mahājanā tathāgatassa rūpakāyaṃ paccakkhabhūtā viya ahesuṃ.

Adīṭṭhapubbaṃ satthussa pāṭihāraṃ mahājanā;
Disvā pītiparā jātā pasādamajjhagaṃ jine.

Pūjesuṃ gandhamālañca alaṅkāraṃ sakaṃ sakaṃ;
Sabbe vandimsu siraṣā-cetiyaṃ īdisaṃ varaṃ.

Tasmiṃ samāgame eko paṇḍitapuriso jinaṃ thomento evamāha?

Nibbutassāpi buddhassa yaso bhavati īdiso;
Ṭhīṭassa lokanāthassa kīdisā āsi sampadā.

Anubhāvamidaṃ sabbaṃ puññeneva mahesino;
Kareyya ñatvā puññaṃ taṃ patthento bodhimuttamaṃ.

Tasmiṃ kāle nānāratanaṅgacittāṃ anekālaṅkārapatimaṇḍitaṃ mahārahaṃ
samussitadhajapatākaṃ nānāvidhakusumasamākiṇṇaṃ anekapūjāvīdhānaṃ gahetvā manussā
chaṇavesaṃ gaṇhiṃsu. Anekavidhaturiyasaṅghuṭṭaṃ ahoṣi. Tasmiṃ khaṇe devatāyo pupphavassaṃ
vassāpenti. Mahānubhāvasampannā nāgā pūjaṃ karonti. Evaṃ sabbe devā nāgā manussā
sādhukāraṃ denti, apphoṭenti, velukkhepaṃ karonti, hatthīno kuñcanaḍaṃ nadanti. Assā tuṭṭhiravaṃ
ravanti, bahalaghana mahāpathavī yāva udakapariyaṃtaṃ kampa. Disāsu vijjullatā nicchariṃsu.
Sakalalaṅkādiṭṭe sumanakūṭādayo mahānagā kusumagaṇasamākiṇṇā ahesuṃ. Sabbe jalāsāyā
pañcavidha padumasaṅchantā, devatānamantare manussā, manussānaṃ antare
yakkhanāgasupaṇṇādayo ca ahesuṃ. Bhikkhubhikkhunīpāsaka upāsikā aparimāṇā ahesuṃ.
Mahantena sādhukārena mahā nigghosena sakalalaṅkādiṭṭe tibbavātābhīhataṃsamuddo viya
ekaninnādaṃ ekanigghosaṃ ahoṣi. Iminā pūjāvīdhānena pasādakabhūtamahājanakāyamaṃjhe dhātu
pāṭihāriyaṃ dassetvā ākāṣato otarivā buddhapaṭimāya nalāṭe puṇṇacandasassirīkaṃ
abhibhavantaṃmiva virocamaṇā patiṭṭhāsi.

Rājā mahānandanāmakassa amaccassa hatthato kesadhātuṃ gahetvā vihāradeviyā datvā tvaṃ
imā kesadhātuyo dasabalassa anavalokita matthake patiṭṭhāpehi'ti āha. Sā kesadhātuyo gahetvā
tattheva patiṭṭhahantu'ti adhiṭṭhānaṃ akāsi. Tasmiṃ khaṇe kesadhātuyo karaṇḍato nabhaṃ uggantvā
mayūragīvasaṃkāsaṇīlaraṃsiyo vissajjenti ākāṣato otarivā buddhapaṭimāya uttamaṅge siraṣāya
patiṭṭhahimsu.

Tato rājā therena saddhiṃ dhātugabbhaṃ pavisitvā dibbacandanacuṇṇasamākiṇṇaṃ
pāricchattakakoviḷārādi sugandhapupphasantharaṃ viyūhitvā pabhāsamudayasamākiṇṇe cattāro
maṇi pāsāṇe ṭhapesi. Tesāṃ ālokābhībhūto dhātugabbho ativiya virocittha. Sabbanāṭakitthīyo attano
attano ābharaṇāni omuñcivā dhātugabbheya pūjesuṃ. Tato rājā dhātunidhānaṃ katvā
buddharūpassa pādāle sīsaṃ ṭhapetvā nipanno evaṃ paridevi; mayhaṃ
pitupitāmahaparamparāgatādhātu ajja ādiṃ katvā ito paṭṭhāya viyogā jātā ahaṃ dāni tumhākaṃ
aticiraṃ (ṭhīṭā) ramaṇīyā rohaṇajanapadā āharitvā imasmiṃ ṭhāne patiṭṭhāpesinti vatvā sineru
muddhani samujjalamaḥāpadīpo viya tumhe idheva ṭhīṭā. Idāni na gamissāma mayaṃ khamatha
bhagavā'ti paridevamāno dhātu gabbheya pativā āha?

Aho viyogaṃ dukkhaṃ me etā bādhenti dhātuyo;
Vatvā so paridevanto dhātugabbhe sayī tadā.

Marissāmi no gamissaṃ ayyaṃ hitvā idheva'haṃ;
Dullabhaṃ dassanaṃ tassa saṃsāre carato mamā'ti.

Vatvā paridevanto nipajji. Tassa pana bhikkhusaṅghassa antare sahadevo nāma thero rājānaṃ
dhātugabbhe rodamaṇaṃ nipannaṃ disvā kimajjhāsāyo etassā'ti cetopariyañāṇena samantāharitvā
idha nipanno marissāmi'ti nipannabhāvaṃ jānitvā iddhiyā saṃsaraṃ piyarūpaṃ māpetvā
dhātugabbhato taṃ bahi akāsi.

(Iddhiyā so vasipatto chaḷabhiñño visārado;
Taṃ khaṇaṇīeva sappañño rājānaṃ taṃ bahi akā.)

Tato paṭhamānītajotiraṅga pāsāṇaṃ dhātugabbhassa upari vitānaṃ viya ṭhapetvā arahantā? Dhātugabbho samantato caturassamañcaṃ viya ekaghano hotu. Dhātu gabbhe gandhā mā sussantu, pupphāni mā milāyantu, ratanāni mā vivaṇṇā hontu, pūjanīyabhaṇḍāni mā nassantu, paccatthikapaccāmittānaṃ okāso vā vivaro vā mā hotu'ti adhiṭṭhahimsu. Tato rājā dhātuyo mahantaṃ pūjaṃ katvā maṅgalacetiye caturassakoṭṭhakaṃ atimanoramaṃ chattakammañca kelāsakūṭaṃ viya sudhākammañca vālukapādato paṭṭhāya sabbañca kattabbaṃ kammaṃ niṭṭhāpesi. So pana seta nimmalacandaramsi viya udakabubbula kelāsakūṭapaṭibhāgo chattadharo acalappatiṭṭhito sujanappasādako aññatitthīya maddanakaro maṅgalathūpo virocittha.

Vilāsamāno aṭṭhāsi tosayanto mahājane;
Maṅgalakelāsathūpo acalo suppatiṭṭhito.

Sujanappasādanakaro titthiyadiṭṭhimaddano;
Bhavi saddhākaro seṭṭho sabbajanapasādako.

Cetiyo pavaro loke mahājananisevito;
Dhajapupphasamākiṇṇo sadā pūjāraho bhavi.

Bahū janā samāgamma nānā desā samāgatā;
Pūjesuṃ taṃ mahāthūpaṃ sabbadāpi atanditā.

Īdiso patirūpavāso so deso dullabho bhavo;
Appamattā sadā santā vinātha kusalaṃ bahunti.

Rājā kappāsikasukhumavatthena mahārahaṃ cetiyaṃ veṭhetvā, sirivaḍḍhanaṃ nāma mahābodhiṃ patiṭṭhapetvā tattha bodhigharañca kārāpetvā tibhūmakaṃ uposathāgāraṃ kārāpetvā rattiṭṭhāna divaṭṭhānādīni katvā sabbaṃ vihāre kattabbaṃ kāresi. Ettakaṃ kārāpetvā vihāraṃ dakkhiṇodakaṃ dassāmī'ti cintetvā asītisahassamattānaṃ bhikkhūnaṃ sattadivasāni nānāvidha sūpavyañjanehi mahādānaṃ datvā sattame divase mahābhikkhu saṅghassa ticīvaratthāya vatthāni dāpetvā pātova pātarāsabhataṃ bhujjivā therassa santikaṃ gantvā vanditvā ekamantaṃ ṭhīto evamāha? Ayyā, cātuddasike mahābhikkhusaṅghassa dakkhiṇaṃ dātumicchāmī'ti. So panāyasmā evamāha; upakaṭṭha puṇṇamāyaṃ uposathadivase assayujanakkhattena dakkhiṇaṃ dhātuṃ bhaddakanti. So therassa vacanaṃ sutvā pañcapatiṭṭhitena therāṃ vanditvā somanagare attano bhaginiṃ devim katesi? Bhagini, dasabalassa nalāṭadhātuṃ nidahitvā maṅgalamahācetiyaṃnurūpaṃ pāsādaṃ alaṅkatadvāraṭṭalākatorānaṃ seta vattha anekadhajasamākiṇṇaṃ vihārañca kārāpetvā dakkhiṇaṃ dassāmī'ti ayyassa katesiṃ. So panāyasmā; upakaṭṭha puṇṇamāya uposathadivase dātum yuttanti āhā'ti. Deva, kiṃ katesi, ayyassa kathitaniyāmeneva upakaṭṭha puṇṇamāya uposathadivase dakkhiṇaṃ dehī'ti āha. So tassā kathaṃ sutvā somanassapatto sādhu bhadda'ti sampaṭicchitvā somanagare viharanto, upakaṭṭha puṇṇamāya uposathe sampattheyeva ajjuposatho'ti ṇatvā giriabhayaṃ pakkosāpetvā, tāta sve dakkhiṇaṃ dātubbaṃ tvam senaṅgaṃ alaṅkaritvā sve amhehi saddhiṃ ehi'ti vatvā serunagare sivarāṇṇo loṇanagare mahānāgaraṇṇo paṇṇaṃ paṇṇi. Sve tumhākaṃ hatthiassarathapattādīni suvaṇṇālaṅkārehi alaṅkaritvā sve amhehi saddhiṃ chaṇa vesam gāhāpetvā ayyassa tissattherassa dakkhiṇaṃ dīyamānaṃ samosarantuti. Te pana rājāno sāsaṇaṃ sutvā attano attano vibhavanurūpena hatthiassarathapattādīni alaṅkaritvā gandhapañcaṅgulikaṃ datvā suvaṇṇamālādīni pilandhāpetvā mahā goṇepi tatheva alaṅkaritvā siṅgesu suvaṇṇakañcukaṃ (paṭi) muñcāpetvā amaccagahapati-brāhmaṇaputta-ajagopaka-khujjavāmanaka-senāpatiādayo ca vicittavatthāni nivāsetvā nānāvidhavilepanāni vilimpetvā āgantvā raṇṇo dassayimsu. Rājāpi caturaṅginīyā senāya parivuto alaṅkatahatthikkhandhaṃ āruhi. Sesarājāno ca attano attano senaṅgehi parivāretvā hatthikkhandhe nisīditvā rājānaṃ majjhe katvā vāmadakkhiṇapassato namassamānā nikkhamimsu. Tassa pana gamaṇaṃ ajātasattuno tathāgatassa dassanattāya jīvakambavanagamaṇaṃ viya tiṃsayo janappamaṇaṃ erāvaṇa hatthikkhandhaṃ āruhitvā dvīsu devalokesu devehi parivāretvā sakkassa devānamindassa nandanavanagamaṇakālo viya ca ahoṣi. So vaḍḍhamāsakachāyāya sampattāya somanagarato nikkhamitvā serudahassa ante nānāvidha alaṅkatapaṭiyattanaṭakittinaṃ pañcaṅgikaturiyaṃ paggaṇhāpayamāno aṭṭhāsi.

Mahāpathavī bhijjamānā viya pabbatā parivattamānā viya mahāsamuddo (thalam) avattharivā bhijjamānakālo viya ca ahosi. Brāhmaṇā jayamukhamaṅgalikā sotthi vacanaṃ vadimsu. Sabbālaṅkārapatimaṅḍitā nāṭakitthiyo pañcaṅgikaturiyaṃ pavattayimsu. Mahājano velukkhepasahassāni pavattesi. Tato rājā bahū gandhadīpadhūpādayo gāhāpetvā utthāya senāya parivuto therassa vasanaṭṭhānaṃ pavisitvā theram vanditvā nisinno āha? Ayya rājāno ca sampiṅḍitvā dakkhiṇodakassa dīyamānassa kālo'ti. Thero tassa katham sutvā bhaddakaṃ mahārājā'ti sampaṭicchi. Tasmim dakkhiṇodakassa dānadivase nānāvidhavicittamaṇidaṇḍakesu nānāvidha dhajapatākādīni bandhāpetvā samussitāni ahesuṃ. Purimādī disāsu manuññavātā vāyimsu. Tathā mahāraṃsijālasamujjalito sahasaraṃsibhākaro atthaṅgato ahosi. Vipphuritakiraṇarajadhūmarāhuabbhādīhi uparodhehi virahito tārāgaṇaparivuto puṇṇacando samujjalaratamayaṃ ādāsamaṅḍalam viya pācīnadisato samuggato. Tasmim khaṇe daṇḍadīpikādayo samujjalāpesuṃ. Mahāmaṅgalacetiyaṃ pana jātisumanamālādāmena parikkhipitvā ekamālāguṇaṃ viya alaṅkari. Yathā tārāgaṇaparivuto puṇṇacando tathā padīpamālālaṅkato mahācetiyo ativiya virocāti. Sakala laṅkādiṇe pana sabbe rukkhāpi vicittadhajena alaṅkatā viya akālapalalavehi vicittā ahesuṃ. Mahāsamuddaloṇasāgarādayo'pi pañcavidhapadumasañchannā ahesuṃ.

Vicitravatthābharanehi sabbe,
Alaṅkatā devasamānaṇṇā;
Anekasaṅkhyā sumanā patītā,
Janā samantā parivārayimsu.

Sabbeva ujjalāpesuṃ daṇḍadīpaṃ manoramaṃ;
Sakalampi idaṃ dīpaṃ āsi obhāsitaṃ tadā.

Tārāgaṇasamākiṇṇo puṇṇacandova jotayī;
Sārade nabhamajjhamhi ṭhito ruciraraṃsiyā.

Tathā ayaṃ thūpavaro suppbhāso alaṅkato;
Mālāpadīpamajjhamhi bhāti bhutilakuttamo.

Sabbe'pi pādapā assa laṅkādiṇissa sabbaso;
Dhaje'va samākiṇṇā āsuṃ pupphaphalandadā.

Sacetanā yathā sabbe akā pūjaṃ akā tadā;
Tathā acetanā sabbe akā pūjaṃ anappakaṃ.

Yebhuyyena bhumaṭṭhe deve upādāya yāva akaṇiṭṭhakā devā brahmā dibbamālāpāricchattakakoviḷāracandanacuṇṇaṃ gahetvā āgatādevāti vā manussāti vā jānituṃ asakkonti. Ukkaṭṭhamahāsamāgamo ahosi. Tasmimpi divase mahāpathavi ākāsayugandharacakkavāḷapabbatuttamādayo kampimsu. Taṃ disvā rājā ativiya somanassapatto there ca avasesa mahāmattādayo sannipātetvā nāṭakādayo ca gahetvā, idānevāhaṃ vihāradakkhiṇaṃ dassāmi'ti cetiyaṅgaṇaṃ agamāsi. Theropi bhikkhusaṅghaṃ gahetvā cetiyaṅgaṇe alaṅkatamaṅḍape nisīdi. Rājā vāsitaṅgandhodakasuvaṇṇabhīnkāraṃ gahetvā udakaṃ therassa hatthe āsiñcitvā dakkhiṇaṃ adāsi. Datvā ca pana evamāha; ayyā esā dhātu mayhaṃ pitāmahavaṃsena āgatā. Idāni amhākaṃ atiruciramaṇiyā rohaṇajanapadā āharitvā suvaṇṇena dhātugabbhaṃ, sattaratanena dhātumaṅḍapaṃ kārapetvā tasmim suvaṇṇamayaṃ buddhapaṭimaṃ nisīdāpetvā amhākaṃ dasabalassa nalāṭadhātuṃ nidahitvā ayyassa cīvarādīnamatthāya idāni soḷasagāmarāni dassāmi'ti gāmarāni datvā samantato tigāvutappamāṇe serudahe bherim carāpetvā āramikaṃ katvā āha? Bhante, tumhākaṃ mayā dinnasoḷasagāmaṃ ajjeva gantabbaṃ. Gantvā ca pana ajjeva pariggahaṃ karothāti vatvā tattheva vāsupagato puna divase samāgantvā sattāhaṃ mahādānaṃ datvā sattame divase mahābhikkhusaṅghassa ticīvarappahonakasāṭakaṃ paṇītaṃ bhojanaṃ datvā therassa santikaṃ āgato, ayya vihāre kattabbaṃ aparihāpetvā mayā kataṃ, gehaṃ gamissāmīti (nivedesi). Thero tassa katham sutvā sādhu mahārājāti sampaṭicchi.

So pana cetiyassa pūjanatthāya pupphārāmaṃ kārāpetvā mālākārānaṃ paribbayaṃ dāpesi. Tathā bherivādakanāṭakānampi vihārasīmante suvaṇṇanaṅgalena paricchinditvā ārāmikānampi gāmaṃ kārāpesi. Bhikkhusaṅghassa veyyāvaccatthāya attano santike pañcasataamaccadhītarō tattake amaccaputte dāsādāsiyo ca datvā paribbayatthāya tesam tesam pañcasatasahassakahāpaṇe ca dāpesi. Bhikkhusaṅghassa ca dhātupujanatthāya soḷasasahassaṃ kahāpaṇaṃ dāpesi.

Tato giriabhayaṃ pakkosāpetvā, tāta tumhe idheva niccaṃ vasatha. Amhākaṃ vihāre ca ārāmikesu ca ayyesu ca appamatto hohīti ovaditvā sabbaṃ tassa niyyādesi. Thero tassa evamāha? Mahārāja samantato mahāsīmaṃ bandhitabbanti. Bandhatha bhanteti vutte? Mahārāja akittitena nimittena sīmaṃ bandhituṃ nasakkā, vihārassa pācīna pacchimuttaradakkhiṇato mahāsīmaṃ bandhanāya nimittaṃ sallakkhetvā dehi, mayaṃ sīmaṃ bandhissāmāti āha. Rājā tuṭṭho satta amacce sabbālaṅkārena alaṅkaritvā sīmānimittaṃ kittitvā āgamanatthaṃ pesesi. Te pana satta amaccā catusu disāsu nimittaṃ sallakkhetvā paṇṇe likhitvā āharitvā rañño adamsu. Rājā ekekaṃ satakahāpaṇaṃ datvā catusu disāsu ārakkhaṃ dāpetvā sīmaṃ bandhantūti mahābhikkhusaṅghassa nivedesi. Atha thero bhikkhusaṅghaparivuto cetiyaṅgaṇe nisīditvā vappamāsakālapakkhadvādasadivase sīmaṃ bandhitvā niṭṭhapesi.

Tattha sīmānimittaṃ evaṃ jānitabbaṃ; purimāya disāya sigāla pāsāṇaṃ gato. Tato macchaselagāmaṃ vāma passena koṭasīmā nāma gāmakkhettaṃ vissajjetvā gaṇadvāragāmaṃ gato. Cittavāpiyā uttaravāna koṭito varagāmakkhette piṭṭhipāsāṇaṃ gato. Tato sālīkaṃ nāma madhukarukkhe ṭhītapāsāṇathūpassa gato. Tato vuttika nāma vāpiyā dakkhiṇavāna koṭito kaṇikāra selassa gato. Tato channajjhāpitaselassa gato. Tato kukkuṭasiva nāma upāsakassa madhukarukkhe ṭhītaṃ thūpaṃ gato. Tato soṇḍaṃ nāma selaṃ gato. Tato sabaraṃ nāma pāsāṇaṃ gato. Tato elālatitthassa gato. Tato sobbha majjhimena gantvā assabandhanaṃ nāma ṭhānaṃ gato. Tato pāsāṇassa matthake udaka kākāṃ nāma nigrodhaṃ gato. So rukkho udaka kākānaṃ vusita bhāvena evaṃ nāma jāto. Tato tambatitthaṃ nāma gantā mahācārikassanāma thūpamaggassa gato. Tato assamaṇḍalapiṭṭhiṃ gato. Tato mahā kadamba passe ṭhītaṃ pāsāṇathūpaṃ gato. Tato mahā rājūvāpiyā uttarakoṭiyā ṭhītaṃ mahānigrodharukkhaṃ gato. Tato mahāvanapiṭṭhiṃ gato. Tato loṇasāgarassa ante rajataselaṃ gato. Puna āvattitvā sigāla pāsāṇeyeva ṭhīto. Imaṃ ettakaṃ padesaṃ samantato paricchindāpetvā rājā adāsi. Vihārassa bahū ārāmike ca (tesaṃ) vividhāni upakaraṇāni (ca) dāpetvā sabbe pākāratoraṇādayo kārāpetvā vihāraṃ niṭṭhāpetvā rohaṇameva gato.

Rājā pasannahadayo mahāpuñño mahābalo;
Kāretvā uttamaṃ thūpaṃ kañcanagghika sobhitaṃ.

Bandhāpetvā tato sīmaṃ vaṭṭagāmaṇca soḷasa;
Datvā ārāmikānaṇca sabbupakaraṇāni ca.

Tato so rohaṇaṃ gantvā mahāsenāpurakkhato;
Vihāradeviyā saddhiṃ modamāno vasī tahiṃ.

Thero pana tattheva viharanto yo imasmiṃ vihāre vasanto tathāgatassa ekagandhakuṭiyāṃ vuttho viya bhavissatīti khyākaritvā tato paṭṭhāya sīlācārasamādhisamāpattipaṭiladdhajaḷabhiññāpaṭisambhidappattehi khīṇāsavehi parivāretvā sabba buddhagaṇaṃ anussaranto ciramaṃ vasitvā tattheva anupādīsēsāya nibbānadhātuyā parinibbāyi.

Anekagaṇasampanno tissatthero bahussuto;
Janānaṃ saṅghamaṅkatvā nibbuto so anāsavo.

Therāpi te sīlasamādhivyuttā,
Bahussutā sādhuṅgaṇābhīrāmā;
Paññāpabhāvāyuppannacittā,
Guṇākarā tānāyutā janānaṃ.

Pahīnabhavasamaṣārā pabhinnapaṭisambhidā;

Nāmarūpaṃ samāsanto pesalā chinnabandhanā.

Sattānaṃ uttamaṃ santiṃ katvā ca janasaṅgahaṃ;
Nibbutā te mahāpaññā padīpoca sumānasā.

Iti ariyajanappasādanatthāya kate dhātuvamse

Dhātunidhānādhikāro nāma

Pañcama paricchedo.

Iminā kārāpitavihārā kathetabbā; vihāradevīmahāvihāraṃ, chātapabbata vihāraṃ, samuddavihāraṃ, cittalapabbatavihāraṃ, bhaddapāsāṇadvāravihāraṃ, acchagalla vihāraṃ, koḷambatisapabbatavihāraṃ, gaṇavihāraṃ, kālakavihāraṃ, dukkhapālaka vihāraṃ, uccaṅgaṇavihāraṃ, koṭitissavihāraṃ, tassa pana ekanāmaṃ katvā kārāpīte mahāgāme tissamahāvihārādiṃ katvā ekasataaṭṭhavīsavihārāni katāni ahesuṃ.

Aṭṭhavīsaekasatavihāraṇca mahārahaṃ;
Vihāradeviyā saddhiṃ kārāpesi mahāyaso.

Tato paṭṭhāya rājā mahādānaṃ datvā puññāni katvā tato cuto devaloke nibbatti.

Katvāni puññakammāni anekāni mahāyaso;
Atthaṃ janassa katvāna gantvāna tusitaṃ puraṃ.

So tatha dibbasampattiṃ cīraṃ bhuñjiya nandito;
Mahāvībhavasampanno devatānaṃ purakkhato.

Tampi sampattimohāya jīvaloke manorame;
Lokuttaraṃ sivaṃ khemaṃ icchanto āgamissati.

So tato cuto jambudīpe nibbattitvā metteyya bhagavato pitā subrahmā nāma bhavissati. Vihāradevī tasseva mātā brahmavatī nāma brāhmaṇī bhavissati. Abhayagāmaṇīkumāro tasseva metteyyassa bhagavato paṭhamaggasāvako bhavissati. Kaniṭṭho saddhātisso dutiyaggasāvako bhavissati.

Ettāvatā nalāṭadhātu saṃvaṇṇanā samattā.

Dhātuvamso samatto.

Anena puññakammena saṃsaranto bhavābhavē;
Sabbattha paṇḍito homī sārīputtova paññavā.

Arimedassa buddhassa pabbajitvāna sāsane;
Nibbānaṃ pāpuṇitvāna muñcemi bhavabandhanā.

Anena me sabbabhavābhavē'haṃ,
Bhaveyyamekantaparānukampī;
Kulī balī ceva satī matī ca,
Kavīhisantehi sadā samaṅgī.

Paññāvantānaṃ aggo bhavatu.